

東
華
續
錄

東華續錄

咸豐六十四

臣王先謙敬編

臣陶澐宣蒸校

九月乙卯朔日食○諭內閣赫特賀等奏班禪額爾德尼呼畢勒罕見訪得靈秀二童等語呼畢勒罕涅槃將及四載今據赫特賀等奏稱訪得知覺異常靈妙二童實屬祥瑞朕心快悅著照所奏卽照定例將此二童之名入於金瓶內嘽經敬謹掣籤以定呼畢勒罕侯掣定後由驛馳奏○軍機大臣等會同戶部嚴議山西巡撫王慶雲奏軍務省分籌餉維艱請碾動州縣倉穀備發兵糈加卯鼓鑄藉資搭放一摺查錢米二項相輔而行以佐餉銀之不足實爲因時制宜起見應如所請從之○丙辰諭軍機大臣等官文胡林翼奏水陸各軍連獲勝仗並賊黨上竄添調兵勇堵剿一摺

武昌援賊經官軍擊敗後又復糾黃州屯聚之匪上竄北岸該督等務飭所派兵勇實力堵剿使城外之賊絕其外援城內之賊斷其接應毋令勾結蔓延至黃州孝感一帶實爲豫省門戶儻上游堵剿嚴密勢恐紛紛竄往更當豫飭各屬厚集兵練妥爲防範杜賊北竄之路不得稍形鬆懈官文見在紮營距漢陽甚近著卽嚴斷賊匪接濟使之坐困一面督飭將弁相機進攻早圖克復不得曠日持久徒託空言自干咎戾將此由六百里諭令知之○諭英桂疊次奏報潁州剿匪及擒匪回竄雒河各情形凡有舉効均經降旨允准該撫見在移營陳州朕聞其所駐地方距擒匪見踞之石弓山龍山湖西陽集等巢穴尙有四五百里旣未身親行陣一切奏報豈能盡皆得實卽如袁甲三在潁州剿匪時朕聞其自七月初一二日以後連次失利與該撫所奏情形不甚符合張逆由

雒河逃竄時聞其尙有餘黨數千人馬一二千匹亦與該撫所奏賊止數百名之語不符當捻匪竄踞板橋展溝之時適值賊圍蒙城塔思哈由下蔡赴援並非徑赴懷遠西凌阿崇安扼守雒河原以防賊回竄聞其所帶兵勇不下數千雖據該撫以移營退守奏參何復以寡不敵眾之辭入奏又聞多慧遇事張皇正陽紳民有額畱皖軍彈壓之事該撫既總統三省剿匪事宜自應親歷行陣將士方克用命若止顧豫省門戶而於皖省捻匪聚集之地專委之帶兵各員據其稟報一面之詞輒行入奏必致勝敗不分舉劾不當軍心渙散貽誤豈可勝言著英桂卽日親督官軍出境兜剿不得專駐陳州擁兵自衛並將朕所聞各情逐一詳晰覆奏如袁甲三崇安西凌阿等實有掩敗爲勝並見賊退避情事卽行據實嚴參儻仍前株守不卽進兵或舉劾失實致誤事機朕必將英桂

從重治罪將此由六百里諭令知之○諭前據福濟奏擬酌帶兵勇前赴臨淮當經諭令該撫迅速前往俾鄭魁士得以赴廬州接替和春本日復據和春福濟奏援賊屬集巢縣親督兵勇分南北兩路進攻等語於該撫何時可赴臨淮並未奏及廬江克復後賊聚巢縣和春福濟會同督剿原屬先其所急惟江南軍務緊要統帥需人著將巢縣迅速克復以便福濟鄭魁士遞相接替和春即可馳赴丹陽不至久稽時日至三省官兵剿捕擒匪英桂身爲統帥固屬責無旁貸而皖省所派鎮將中儻有遷延觀望致以有用之兵置之無用之地者福濟亦應從嚴參辦豈可心存回護謾過他人卽英桂駐紮陳州未能親臨行陣聞不確以致賞罰不公福濟既有見聞或據實面商或秉公參奏總期於軍務有益方爲盡心國事儻敢各存意見坐觀成敗貽誤事機朕亦必治該撫以

應得之咎另片奏據鄭魁士函稱亟須酌撥馬隊等語著准其將
伊興額馬隊五百名調往助剿將此由六百里諭令知之○安徽
巡撫福濟奏接據鎮臣鄭魁士函稱剿辦捻匪情節得旨鄭魁士
縷述各情頗有關係所言雖與英桂奏摺不符皆在朕意料之中
總緣英桂未身臨行陣袁甲三是己非人卽如郝光甲珠克登塔
思哈亦皆有觀望之處第袁甲三知其一未知其二參劾未免過
當也○追予故湖北提督向榮於江蘇建祠○戊午諭內閣本年
近畿各屬因永定河漫溢間被水災農田晚稼亦有被蝗之處京
師糧價昂貴貧民度日維艱所有五城設廠煮飯散放著先期半
月於本月十六開放並著展限一箇月至來春三月十五日止以
資接濟○怡良奏八月十七至二十二日傳振邦督帶兵勇由溧
陽進發馳抵定埠以上之南城紮營七座明安泰帶兵繼進奏如

虎由建平進發馳抵定埠該鎮等商定分三路進攻該逆出巢分拒各路將備兵勇奮力斬馘數百名賊勢稍卻另有股匪鈔我後路參將李定太等合圍兜剿斷其歸路痛加剿洗壘內之賊正欲出救明安泰已將頭二三道賊卡焚毀傅振邦秦如虎分路進攻亦將四五兩道卡內之賊盡行燒斃遊擊虎坤元首先拔去壘東賊壘之梅花樁潛伏而進馬永清督勇束草填濠爭先搶入官弁兵勇一擁而上立將賊壘攻破壘賊燒斃殆盡都司周天培拔去壘西賊壘之梅花樁守備秦坤由壘後踰濠撲入接應周天培將壘內之賊剿殺淨盡守備于紹昌進攻壘中賊壘兵勇爬牆而入賊壘亦破剿殺無遺而壘後賊壘最爲堅固秦如虎督令拔去梅花樁遊擊張玉良首先衝過濠溝各路官弁兵勇四路爬牆拋擲火罐該逆冒死衝出望高濱一路逃竄東壘肅清至金壇擊敗之

賊又竊踞寶堰爲巢穴並在金角地方結壘爲犄角之勢副將王浚等統帶兵勇馳赴陶巷鋪分築營盤十一座參將李若珠等督帶兵勇移紮九里地方嚴堵內犯之路王浚等督隊進攻該逆隔河迎拒見我兵威壯盛紛紛敗退餘賊在陳吳趙莊放火搶掠王浚等分兵三路馳往追剿適有茅莊等村團練笪熙等率領壯丁數千齊來協助守備黃金友督率兵勇民團乘勝壓下該逆狂奔鼠竄退回句容追殺二十餘里始行收隊臣張國樑馳抵陶巷鋪督令王浚等移營進逼該逆聞風惶懼出巢分兩路竄赴句容當將金角寶堰逆壘全行平毀臣張國樑卽督同各營兵勇進紮離句容縣城三十餘里之行鎮地方相機進剿臣見與臣福興臣張國樑往返熟商乘此銳氣飭令秦如虎督兵駐紮東壩兼顧建平傅振邦再於溧陽防兵內挑帶勁旅千餘名並飭與秦如虎商酌

抽撥所部千餘名連傅振邦原統兵勇其約六千名卽由茅公鋪
高滄一路沿途掃蕩進取溧水並調明安泰亦於溧陽防兵內抽
撥千名前赴寶堰督同李若珠等由句容南路進攻臣張國樑俟
將黃茅莊逆匪剿洗淨盡卽從句容東路進攻其金壇地方情形
稍鬆有遊擊李鴻勳統帶兵勇一千九百餘名足資防堵卽飭虎
嵩林統帶川兵五百餘名前赴溧陽會商傅振邦秦如虎擇要駐
紮爲後路援應惟前調福建廣東官兵尙無來江之期見在大營
兵勇四路分撥堵剿實有兼顧不遑之勢殊深焦灼 上諭軍機
大臣等前據怡良等奏請飭浙江將協濟江南大營軍餉仍按月
撥解六萬兩以資接濟當經批諭以此項餉銀已允何桂清所請
停解仍著於蘇省藩關各款內竭力籌措本日復據怡良奏稱大
營餉需本多積欠自退駐丹陽後補製軍械費尤不貲蘇省錢漕

催徵不前藩庫空虛浙關徵稅及上海夷稅均形短絀實屬籌措無術請仍飭浙江按月撥銀六萬兩協濟等語浙江省近年協濟鄰省餉需爲數甚鉅原屬力有不逮惟該撫前請停解摺內本有暫停一二月再行察看情形之語且蘇省籌款無出亦屬實情見在大兵攻克東壩寶堰等賊壘正在得手自須餉項充足藉資進剿著何桂清於無可籌撥之中力圖設法仍將協濟江南餉銀酌量撥解先行接濟萬兩仍俟浙江省防堵稍鬆再行如前撥解俾大營士馬飽騰以維持東南大局前經戶部奏撥廣東餉銀二萬兩河南山東餉銀各五萬兩解赴丹陽軍營並著怡良催提至蘇應用此時東壩已無賊蹤正宜速將甯國收復則江浙門戶均可嚴密著怡良何桂清督飭鄧紹良趁此賊勢窮蹙之時速籌攻克勿再延緩金壇溧陽等處防兵並著飭令各該將弁嚴密防守以

便張國樑等進攻句容溧水不至有後顧之患前調閩粵各軍據王懿德奏邵武需兵防堵已准其將琳潤一軍暫留該處其陳上國所統閩兵一千五百名及前調之廣東兵四千名迄今尙未到營並著怡良飛檄催提以資助剿將此由六百里各諭令知之○諭德興阿翁同書奏擊退來安縣土匪並攻剿瓜州情形一摺安徽來安縣土匪聚眾滋事竄擾六合縣境雖經官兵擊退仍慮其與逆匪勾通乘間窺襲自應及早撲滅德興阿等分咨怡良福濟庚長冀其撥兵剿辦惟福濟等正擬進攻巢縣豫省捻匪甚爲喫緊未必能分兵前往庚長駐守清江更屬無兵可撥怡良等甫克東壩寶堰正在得手所謂客兵亦尙未到恐難分撥况西安馬隊五百名已據德興阿等截留江北助剿土匪丹陽大兵力更不敷調遣所有來安土匪卽著德興阿等撥兵追剿毋使蔓延至瓜州

久稽克復該大臣等擬密會水師大舉深入著卽趕緊會合直接賊巢不得仍以虛詞延宕致誤事機將此由六百里諭令知之○予江南傷亡巡檢第五臣等祭葬世職○己未諭軍機大臣等前據廉兆綸奏甯都賊擾貴溪練勇失利已革道員石景芬並無下落當經諭令查明具奏本日據何桂清奏稱當賊匪連陷廣昌等縣貴溪首當其衝生員郭守謙等駐紮貴溪以保廣信石景芬忽以金谿有警撤貴溪之防兵往援並將廣信存兵及府縣練勇精銳悉行挑去該革員行至桂碧地方賊已竄入貴溪郭守謙等陣亡該革員並不回援所統全軍計有二千餘人不知何往據常山縣稟報接據上饒等縣函稱該革員已回樂平本籍等語石景芬以革員效力行間宜如何激發天良勉圖報稱乃種種玩誤實出情理之外著何桂清廉兆綸卽將石景芬提至廣信派員嚴鞠務

得確情從嚴參辦廉兆綸不得以奏請在先稍涉回護其所帶兵勇二千餘人並著廉兆綸迅速派員統帶以資防剿毋任潰散饒廷選見駐廣信著遵照前旨相機前進收復失陷各城再行折回玉山駐紮將此由五百里各諭令知之○以克復太平祁門二縣城免總兵官江長貴處分○子陣亡州同徐焯等祭葬世職○何桂清奏臣接怡良來函總兵傅振邦統帶勁旅三千馳赴溧陽會同明安泰等進取東壩臣卽飛飭秦如虎統兵二千三百名剋期紮出定埠並派遊擊蔣錫光統兵三千名扼紮鍾橋仲孫懋統兵二千二百餘名駐守建平以顧後路嗣傅振邦明安泰秦如虎於八月十九日先後至定埠會齊次日分路進兵直撲賊營槍礮連環逆眾紛紛倒地我軍搶過濠溝砍斃及燒斃逆匪計二千餘名當將賊營三座次第攻破餘孽四散逃竄又被我軍追殺無遺官

弁兵勇微有傷亡臣查東壩爲蘇皖咽喉今全境業已肅清蘇之

溧陽宜荆皖之建平廣德均可無虞內犯惟是東壩高瀆向出江
省大營官兵防堵此次東壩克復以後江省仍必派兵駐紮而甯
國堅城因兵分愈單日久未下雖經鄧紹良明攻暗襲賊勢已形
窮蹙而城內逆黨尙多蕪湖黃池逆援亦未能盡絕乘此兵力稍
舒必得於水陽添紮一營庶於甯國勦辦事宜更有把握臣已檄
行秦如虎先將攻克東壩之浙師駐紮定埠力保皖浙門戶並由
該鎮察看情形卽日分兵進紮水陽杜蕪湖貴池之賊援仲孫懋
一軍飭令仍駐建平均聽鄧紹良調度報聞○庚申命五城煮賑
展至明年四月○壬戌諭內閣有人奏黔省徵額加增並勒令捐
派請飭嚴行禁革一摺據稱貴州州縣徵收錢糧每於正額外加
增平數名曰躡戥費民甚苦之前桐梓縣革役楊隆喜等倡亂皆

藉口除躡戡之害糾眾滋事銅仁府知府葛景萊亦以循舊加徵致匪徒戕官踞城桐梓縣知縣劉毅辦理善後誅求未已以致匪黨復行滋事又該省州縣每勒令苗民捐輸罄其家產該匪之不靖實由官吏逼迫等語州縣徵收錢糧均有定額似此額外加增無怪民不聊生激成事變著恆春蔣霽遠嚴查各州縣如有前項情弊卽著嚴參示懲並將躡戡費名色永遠革除至苗民情願捐輸原屬不禁斷不准不肖官吏勒令派捐卽著於各州縣通衢村鎮出示曉諭以安民心而除弊政將此諭令知之○署四川總督樂斌奏黔省苗匪紛擾鎮遠府城被圍副將蔣玉龍孤軍無援惟有迅撥川兵裹糧助剿並嚴扼竄蜀要路得旨覽奏尙係實在情形惟赴黔官兵隨時解往之餉糈不可遲誤○癸亥諭軍機大臣等恆春奏滇黔兩省情形督辦不能兼顧一摺前因迤東迤西各

屬回匪猖獗疊諭該督酌度緩急折回滇省或札商文祥舒興阿
妥籌布置茲據奏稱都勻等處尙未克復官兵雖疊獲勝仗總因
賊眾兵單未能痛加剿洗是黔省目下情形甚屬緊急恆春仍應
駐黔妥爲督辦一俟該省防剿稍鬆辦有就緒再行折回滇省卽
將黔省軍務交孝順會同蔣蔚遠接辦至黎平需兵救援前已諭
令駱秉章迅調永靖一帶官兵或酌撥練勇由靖州赴援昨復據
樂斌奏報已派遊擊鍾琦帶兵一千名赴鎮遠協剿所需軍餉已
諭令隨時解往矣恆春惟有督飭孝順等奮力攻剿將都勻等處
次第克復仍一面知照文祥舒興阿將滇省回匪妥籌剿撫俾兩
省軍務各有把握不必因不能兼顧另請簡員督辦也將此由五
百里諭令知之○諭前因福濟奏稱捻匪復熾自請督兵赴臨淮
一帶接替鄭魁士相機進剿業經諭令准其前往並會同英桂豫

省官兵合擊此時該撫因攻剿巢湖賊匪眾多不能親赴北路而
擒匪猖獗皖省見無大員可以分派督兵請飭張亮基馳赴懷宿
統帶兵勇張亮基見患目疾由部代奏告假一時未能赴皖福濟
既因巢縣喫重欲乘軍民奮勇之時先圖克復卽毋庸移師北向
英桂遠駐陳州前已諭令出境督辦諒不敢再事遷延所有蒙宿
一帶兵勇應歸何人提調仍著英桂會同福濟商酌籌辦至珠克
登見在會勦懷遠郝光甲塔思哈前往宿州史榮椿帶兵扼守徐
州均屬緊要徐州距蒙宿不遠如該處情形稍鬆卽可令該總兵
移兵至皖會同勦辦以資得力該撫等務當審度情形和衷籌畫
毋存畛域之見自不難次第奏功福濟片奏來安盱眙等處棚民
因旱滋擾業經擊斃多名卽著嚴飭音德布並駐紮臨淮之張光
第就近兼顧毋令蔓延將此由六百里各諭令知之○乙丑諭內

閣怡良趙德轍奏拏獲廣潮匪犯審辦情形一摺廣東潮州等處
莠民以投充壯勇爲名散處蘇州城外其獷悍不法之徒竟敢持
械行劫盜案疊出迨地方兵役緝拏輒復逞兇拒捕經趙德轍飭
令蘇州府知府薛煥會同紳士員弁帶領兵勇於八月初五日夜
閒趁該匪屯聚閭門外之槓子一帶地方分路截拏該匪等放槍
抗拒薛煥督兵齊進登時格殺多名竄逸之匪復被兵勇堵截先
後拏獲匪犯鄭阿層等一百九十餘名並起獲軍械贓物無算與
各事主報案相符提訊該匪等供認不諱見已分別按律懲辦地
方安堵著怡良趙德轍飭屬嚴拏逃犯並隨時接捕餘匪毋稍疏
懈在事官紳密訪匪蹤會商掩捕不至釀成巨患辦理尙爲出力
著該督等擇尤保奏以示鼓勵○諭德興阿翁同書奏水陸進攻
瓜州大獲勝仗一招瓜州逆匪屢經官軍設法誘攻仍復堅匿不

出經德興阿等激勵將士蓄銳齊發東西兩岸陸兵及焦山土橋兩處師船同時並進直逼賊巢土橋水師總兵陳國泰督帶紅單船搶進瓜州大口連向轟擊賊屍布滿江灘焦山水師總兵周士法分隊直抵金山擊沈賊船多隻鎮江官兵亦同日進攻各有斬擒當此南北水陸將士齊心正宜乘機力圖攻克著德興阿翁同書督飭各軍奮力進取毋稍鬆勁○諭英桂奏剿辦擒匪獲勝一摺擒匪由雉河一帶分竄渦河官兵南北兩岸分路進剿八月二十五日崇安等迎擊於耿皇寺格棚額德楞額分隊奮擊斃賊三百餘名二十七日進剿擒首翼得一股遇賊於劉奶廟崇安督率馬步齊進復殲斃數百名本月初一日該匪搭造浮橋紛突北岸營盤官兵分路兜鈔乘勝過河生擒二十餘名落河淹斃者不計其數著英桂督率兵勇乘勝進攻先將盤踞龍山之張逆一股迅

速埽平以期次第殲除毋再延緩○諭軍機大臣等英桂奏捻匪
竄擾渦河兩岸剿辦獲勝並布置情形一摺前因福濟奏巢縣賊
匪眾多親督剿辦未能前往臨淮業經降旨允准本日據英桂奏
稱擒匪於渦河南北兩岸紛擾邱聯恩崇安會剿得勝見令其將
龍山大股迅速埽蕩以遏北竄並令袁甲三駐紮亳州嚴扼南路
兼顧西路布置尙屬周妥惟福濟未能前赴臨淮英桂於剿匪事
宜更屬責無旁貸著遵照前旨統帶兵勇剋日出境督辦以期迅
速蕺事毋許株守陳州遷延觀望自干咎戾前令飭查西凌阿崇
安由雉河退守何以日久並未參奏英桂向來辦理一切均覺遲
緩著迅速覆奏將此由六百里諭令知之○德興阿翁同書奏據
派防觀音門總兵陳世忠稟稱八月二十五六等日見有長髮屍
骸不可數計由觀音門口內漂流出江內有結連捆縛及身穿黃

衣黃袿者當經探得金陵逆賊內亂自相戕害首逆楊秀青已被
殺死並殺楊逆黨與多人覈與各營縣所報俱符報聞○丙寅諭
內閣怡良趙德轍奏請減免美利堅未繳關稅一摺上海通商各
國應交江海關稅銀因上年匪徒滋事貿易未能照常商情苦累
曾經諭令該督撫酌量覈減茲據查明美利堅國積欠稅鈔銀三
十五萬餘兩該國使臣情願繳銀八萬一千五百餘兩又從前已
納稅銀二萬七千六百餘兩其未繳銀兩爲數尙鉅惟念該國商
力拮据係屬實情所有咸豐四年六月十八日以前美利堅欠交
稅鈔銀兩除業經呈繳外餘著加恩概行豁免以示體恤○丁卯
予廣西殉難知府李載文等祭葬世職○戊辰予江南陣亡理問
李芬等祭葬世職○己巳諭軍機大臣等恆春奏逆匪捏造僞文
糾眾倡亂並浪穹縣失守見籌剿辦等語逆匪趙子澂等本係上

年開糧戕官逸犯輒敢捏造僞文煽惑良民糾眾抗官殺傷練勇
不法已極必應趕緊撲滅毋令勾結黨與日事蔓延五硯十一鄉
居民業經該督剴切曉諭務當散其脅從使賊勢日孤勦辦自易
爲力所調鎮筇鎮官兵二千名既有粵餉堪資接濟諒卽馳赴銅
仁援勦著卽督飭韓超扼駐邛水會同蔣玉龍激勵民團實力防
勦勿稍疏失一俟大兵東下卽可次第收復至大理又有回眾數
千屯聚所屬浪穹縣於八月初六日失守實在情形舒興阿諒已
奏報在途見在匪勢猖獗恆春前調四川官兵二千已據樂斌奏
以該省無兵可調僅派遊擊鍾琦帶兵一千名赴鎮遠協勦此項
官兵卽著恆春察看緩急情形酌量調撥並著舒興阿會同提督
文祥先就見有兵力勦撫兼籌迅圖克復恆春見在黔省勢難兼
顧雲南舒興阿身任巡撫責無旁貸著卽督飭文武妥籌辦理毋

得日久遷延自干重咎將此由六百里各諭令知之○庚午諭內閣怡良奏克復高淳縣治進取溧水句容一摺逆匪占踞高淳縣治總兵傅振邦克復東壩後親督大隊進剿該逆入壘抗拒參將李定太等攻破賊壘追至湖濱轟燒賊船數十隻回縣搜捕餘匪高淳一律肅清遂卽進取溧水總兵張國樑旣克寶堰賊巢進攻枝堯里巢穴賊眾分股來犯張國樑復飭精銳包鈔殲斃極多把總韋明堂張順和首先擒殺頭目二名見在移營近偏句容縣城剋日進剿著怡良卽飭該總兵等迅速圖攻以期漸次掃蕩盡殲羣醜○諭軍機大臣等本日據何桂清奏甯國攻剿喫緊秦如虎不能往守東壩等語秦如虎駐紮定埠以保皖浙門戶並分兵進紮水陽杜賊援應自未便調防東壩致建平一帶空虛復據怡良奏已飭秦如虎回駐定埠並派提督德安帶兵勇二千餘名扼守

東壩自應如此辦理見在克復高瀆傳振邦已調溧陽防兵一千名駐紮防守大軍即可步步爲營由茅公鋪等處分路爲進攻溧水之計張國樑營盤逼近句容縣城逆勢已蹙著卽督飭將弁兵勇力圖克復溧水句容二縣爲內犯要路此時兵勇已集加以民團得力攻剿自易得手據何桂清奏金陵逆匪自相戕害楊秀青已被韋逆殺斃各營探報皆稱確有是事與德興阿前奏相同逆匪內亂閉城一月怡良等曾否探明儻有機會可乘時不可失和春已報由廬州啟程卽日馳抵丹陽正可會同籌辦以殄賊氛鄧紹良攻剿甯國尙未克復據何桂清奏江南軍務日有起色儻日後皖南軍情喫重請仍由大營分兵與浙省隨時策應著怡良等察看該處緩急情形統籌全局與何桂清咨商妥辦不至顧此失彼是爲至要所有高瀆失守日期並署知縣楊承忠及文武各員

下落著怡良等查明具奏將此由六百里諭令知之○浙江巡撫何桂清奏報浙省軍情並內防本境外保鄰封援勦助餉事宜得旨汝數載艱辛實爲浙省保障浙省獲全則江南大營方無牽掣之患汝功居多也又奏探報金陵賊首於七月二十二日起閉城自相戕害首逆楊秀青已被韋逆殺斃凡楊逆黨與均經被殺一月有餘尙未開城等語如果屬實則丹陽大營官兵不難進取皖南江右皆爲賊匪去路防勦更形喫緊見咨各路加意嚴防報聞○撥直隸倉穀三萬六千四十石銀三萬兩制錢九萬串分給固安等六州縣饑民○辛未貴州巡撫蔣蔚遠奏黔省兵單餉絀戰守皆難並自陳病狀得旨黔省艱難誰不知之汝若因籌畫無方補救無術自請治罪尙可茲乃歷陳病狀並無辦理之法竟欲罷斥回旗置身事外如此居心殊負委任近已有旨將恆春與汝交

部議處亦不必治罪試汝知慚愧否○以擅離江西貴溪防所已革在籍道員石景芬發往軍臺效力贖罪○壬申諭內閣御史錢以同奏請嚴禁官吏賣荒一招國家愛養黎元凡值水旱偏災無不立沛恩施蠲緩錢漕地方官吏應如何秉公籌辦以期實惠及民若如該御史所奏江蘇省蘇松等屬州縣每遇蠲緩之年書吏輒向業戶索取錢文始爲填註荒歉名爲賣荒出錢者雖豐收亦得緩徵不出錢者雖荒歉亦不獲查辦甚至不肖州縣通同分肥以致開徵時有抗欠鬧漕等事玩法殃民實堪痛恨本年江蘇被擾地方除業經降旨分別蠲緩外其餘各屬尙在查勘著怡良趙德轍嚴禁前項情弊如有書差人等仍敢賣荒舞弊該州縣不加查禁任令向應蠲應緩之戶需索註荒使費者除將書差從重治罪外並將該州縣嚴行參處其業戶勾通書吏以熟作荒蒙混射

利者一併嚴懲以清漕弊而紓民困○曾國藩文俊奏八月初一日僞指揮黃姓糾集臨江奉新安義武甯義甯各處逆黨併合瑞州城內大股號稱四萬四路擁至直撲我軍湘營以數人翼蔽劈山礮俟其逼近擊之賊陣大亂悍賊衝出重圍者近五百人殲斃二百餘人其大隊分投掄斬窮追三十里而返初三日僞將軍石姓自九江來援勒令敗賊仍回瑞州於東北大路立營五座與城內之賊爲犄角楚軍劉騰鴻普承堯與省兵營務處彭山岷羅營等會商速戰初四日黎明出隊該逆擁擁而至待其接近乃發劈山礮殪其賊目賊稍卻又近又殪凡六七次賊氣稍沮省兵躍馬衝陣各營齊進賊遂敗退劉騰鴻破其大壘一座各壘驚惶又連破四座敗賊擁聚一處我軍以一隊橫截之紛紛四竄追殺數里日暮收隊得此兩戰軍心大定援賊竄歸各處省城之路無梗江

西兩湖遂獲疏通初六初九十一二等日接戰屢勝嗣後小有斬獲二十六日南城出賊千餘護破船而上抵湘營之對岸北城西門出賊約二千橫列隄上撲省兵之營劉騰鴻以礮轟南路之賊而令劉連捷劉芳貴由西南截擊省兵得勝軍出擊北路之賊斃尤悍者十餘名我軍亦傷數人二十七日奉新援賊復至瑞州劉騰鴻令省兵各營靜鎮以待以湘後竇中營直搗中堅自帶親兵堵擊南城將賊之第二隊衝開其第一隊亦被我軍截斷縱橫盪決援賊潰遁復撥省兵義武勇回剿新昌上高相機規復奉新安義靖安等縣先是吳坤修等於七月二十五日重復新昌縣派員於二十八日重復上高縣暫畱數日搜捕餘匪八月初八日行抵奉新至縣城北門之獅山我軍高據山巔對城轟擊賊忽繞東城而出直撲我營被我軍殲斃百餘人十一日安義靖安援賊大至

均被我軍圍殺紛紛逃竄十三日吳坤修飭令守備羊瀛等堅守營壘自帶各勇馳勦靖安該逆傾巢逃竄截殺後隊之賊甚多卽日收復縣城十六日復帶各勇馳勦安義銜枚渡河由南門梯城而上該逆開北門而逃吳坤修進城安民次日仍返奉新所有尤爲出力人員先行開列應請立沛恩施以示鼓勵 上諭江西瑞州賊匪糾集臨江奉新安義武甯義甯逆黨合城內大股分路來犯兵勇奮力勦殺大獲勝仗八月初三日僞將軍石姓自九江來援敗賊仍回瑞州楚軍劉騰鴻等於初四日出隊進攻追殺數里踏平賊壘吳坤修等先於七月間復將重踞上高新昌之賊勦除淨盡收復兩縣城池遂於八月初八日行抵奉新十三日收復靖安十六日收復安義此次出力員弁均能奮勇殺賊自應立沛恩施都司彭山岷守備萬泰均著賞戴花翎訓導羅萱著以知縣分

班選用並賞加知州銜奮勇捐軀之外委黃兆麟著照千總例議卹○諭英桂奏江豫各軍勦匪獲勝一摺所稱徐州官軍在鐵佛寺地方獲勝情形業經邵燦庚長奏報其河南官軍於九月初五日密渡吳家河直取馬村橋口該處匪眾悉力來拒總管格綢額營總關保各督馬隊併力直前總管德楞額副將樂善埋伏馬隊齊起鈔截匪眾不支紛紛敗退官軍追殺三十餘里斃賊千餘名落河淹斃者不計其數見在邱聯恩崇安等由西路進兵史榮椿興慶明山等由東路進兵會合豫軍實力夾擊著英桂卽飭各該總兵迅速進剿務將各處匪巢次第掃蕩毋稍延緩○諭軍機大臣等本日據英桂奏遵覆飭查各情仍請暫駐陳州並請令福濟駐紮蒙城史榮椿駐紮臨渙等語覽所奏情形總以防賊西竄陳州爲慮試思該匪見在分踞渦河南北勢甚猖獗非急加痛剿豈

能絕其窺伺之心如必以坐鎮爲防則應防地方豈止陳州一處
福濟鄭魁士見俱前赴巢縣勢不能兼顧蒙宿卽據英桂見壽北
路責之西凌阿徐宗幹亳州責之袁甲三紫城一帶豈可令其漫
無統屬如果該撫親督進剿何至屢稱呼應不靈著英桂仍遵前
旨相機出境毋得徒有居中調度之名轉致遷延株守至樊城土
匪滋事湖北司道大員多在襄陽自應設法撲滅該撫旣經札飭
慶德達沿禮周煦徵先後馳往又調南陽兵前赴鄧州新野自己
足資防堵當此剿匪喫緊之時豈可將邱聯恩一軍率行改調著
英桂卽飭該總兵速行折回隨同進剿毋涉張皇至察哈爾官兵
由京啟程不日卽可到營此項馬隊會聚則能得力不可各路分
撥致成單薄將此由六百里諭令知之○予江西陣亡在籍知府
楊堃等祭葬世職○癸酉諭內閣福清鄭魁士奏攻克無爲州城

一摺安徽無爲州城久被賊踞八月二十八日經該撫派委卽選知府李元華督帶練勇由盛家橋等處進剿適遇悍賊數百擄糧下河兵勇兜圍殲斃九月初一日西南兩門之賊分路攻襲亦經我軍殲斃無數隨於初二日夜間四面設伏圍攻先將東西兩門沿城賊房焚毀兵勇蟻附登城該逆潰逃各門接殺約計斃賊二千餘名生擒百餘名隨將州城克復敗逃之匪復被沿途團練截殺一千七八百名此次剿辦尙爲得手著福濟等嚴飭水陸各軍合力堵剿以冀肅清○福濟鄭魁士奏查巢東四十里東關地方卽古之濡須口爲巢湖出口第一要隘賊於河南北岸安營設卡並於古將臺上築大石城一座外掘深濠四道與巢城犄角臣等密派編修李鴻章募勇前往該員卽飭千總苗順清等招集巢含義勇一千二百名由清溪馬鞍山一路兼程馳抵東關山下急攻

東北面賊卡該逆蠡擁迎拒我軍乘銳進攻銃傷悍賊多名立毀賊卡逆眾退守石營死拒苗順清指揮眾勇攻營分隊直擣西南賊卡援賊沿山竄至耿思義帶隊迎擊殺賊數十名將賊匪大隊壓下臣等諭令趕緊圍剿一面分撥兵勇派守備桂五等管帶由間道馳赴運漕截其歸路一面親率輕騎百餘由北路小徑馳往督攻九月初七日行至西山驛據李鴻章稟報該練勇趕緊環攻搶過第二道濠溝後隊乘勢掘斷外濠將積水一洩而空正欲仰攀而上南岸賊船忽繞出我軍之後撲救賊營苗順清等槍礮連環斃賊不少糾集民夫各帶鐵鍤鋪在北岸石城對面挖營計圍困分飭耿思義等密帶各勇束草結茅潛至城濠乘風引火周圍梅花椿竹籤日久乾枯觸火卽然時風色甚緊石城西北門樓均被延燒逆情驚駭苗順清踊躍登城帶領眾勇刀矛並進直擣中

堅逆屍徧地其越牆竄出之賊紛紛投水而死南岸之賊見勢不
支棄營逃竄至王海渡一帶遇我伏兵縱橫關截直追至運漕而
止查東關要隘巢賊實恃以爲援賊匪全力所爭我軍屢攻不克
今以三年死守之賊巢毀於一旦此皆仰賴 天威民兵合力得
以喪逆膽而絕賊援所有出力員弁兵勇容彙入克復無爲案內
擇尤保獎 上諭官軍攻剿巢縣奪獲賊壘並派兵克復東關所
有出力員弁著福濟鄭魁士彙入克復無爲州案內酌量保奏巢
縣賊勢已孤並著福濟等督飭將士迅圖攻克○諭軍機大臣等
恆春奏雲南回匪猖獗擬回滇籌辦並請簡專員督辦貴州軍務
等語據稱滇省自楊林至平彝一帶徧地皆匪彌勒邱北兩縣回
匪復勾結獵匪乘間竊發徵江臨安兩府幾無完區海口未能獲
勝姚州亦未收復浪穹失守大理被焚開化亦有回獵滋擾是該

省情形較貴州尤爲喫重恆春在黔旣恐往返札商緩不濟急著卽折回雲南督兵進剿此時該督自不能徑趨省城著卽沿途偵探何處匪蹤最重卽由何處進兵先將兇悍大股撲滅一二處其餘自可聞風歛迹然後徐圖掃蕩剿撫兼施方能次第奏功回民族類繁多勢不能概予芟夷則解散之術亦不可緩著該督廣爲示諭除實在戕官撲城逆迹顯著不能赦宥外其脅從及良善之回概置勿問則逆回勢孤良回心安剿撫皆可得手總當審度機宜迅速籌辦至貴州匪勢蔓延剿辦亦宜喫緊孝順素有勇略著卽督辦該省軍務仍會同藩臬遠籌辦所有川滇官兵及本省兵練悉歸該提督調度在事文武員弁統歸節制務將失陷城池一律收復以副委任其被戕之雲南迤西道林廷禧署參將懷唐阿等著恆春查明請卹將此由六百里加緊各諭令知之○諭福濟

奏請飭陝西山東按月撥餉並酌議淮北鹽課等語見在各路軍
餉匱乏皆恃山陝兩省接濟陝西省每次解赴廬州餉銀疊據奏
報或二萬兩或三萬兩不等本日復諭知吳振械照該撫所請五
萬兩之數先行籌解數月以資接濟矣山東省自黃水成災辦理
賑務已形支絀今歲又有被旱被蝗之處勢不能更解皖餉至淮
北鹽課本係分解揚皖兩營本年江北地方蝗旱成災各屬地丁
釐捐均形短絀揚營兵餉亦甚艱難從前皖二揚一章程未便議
復且據怡良庚長前奏正陽三河被匪竄擾票販星散鹽課擄掠
無存是此項課銀總須捻匪肅清行銷有路方能有款可撥當此
籌款維艱該撫仍當力籌設法迅圖滅賊以冀地方正項漸可徵
收其淮鹽引路尤應亟籌疏通庶使餉有來源未可專恃撥款致
有貽誤將此由五百里諭令知之○命陝西巡撫吳振械每月籌

撥銀五萬兩濟安徽軍需○乙亥諭內閣葉名琛奏潯州艇匪下
竄攻破平南催兵進剿一摺潯州艇匪因先後大水漲發乘勢下
竄攻破平南縣城戕害文武員弁情形甚屬猖獗著該督趕緊催
令崑壽督率水陸兵勇會同廣西文武員弁相機追剿迅圖撲滅
其前次議卹之署參將張遇清並著開復頂翎至所稱不知下落
之千總崑芳著查明仍遵前旨與千總蘇海方源分別嚴懲以昭
炯戒○諭軍機大臣等官文胡林翼奏襄陽匪徒滋事派兵剿捕
一摺前據英桂奏襄陽縣匪徒聚眾滋事已飭總兵慶德等調撥
官兵嚴密防堵本日官文等稱探聞北方股匪甚多實爲心腹之
患著官文胡林翼將調出兵勇飭令星馳前往卽飭馬秀儒等會
同常恩迅速接剿務絕根株毋任延蔓一面知照河南官軍會同
兜捕以免此摺被竄該處貧民因被旱荒致爲匪徒煽惑自應亟

籌解散庶不至重煩兵力襄陽等屬被旱成災何以久稽奏報著
官文等速派妥員查勘將應行蠲緩撫恤之處卽日奏聞以紓民
困襄陽府知府海順等已據該督等參奏懲處惟布政使馬秀儒
升任安襄鄖荆道羅遵殿均有地方之責於被旱輕重情形自應
確切查明具詳奏辦何以遲延未報致釀事端並著官文等查明
參奏將此由六百里諭令知之○諭官文胡林翼奏請飭催各該
省按月濟餉等語楚北武漢南北兩岸水陸各軍餉需專恃山陝
四川等省協濟見在攻剿正當喫緊本省餉需無從籌畫必應源
源接濟以期迅速歲事惟所請按月解銀五萬兩之處儘各該省
力有未逮亦必得每月各籌措銀三萬兩如期派員解赴糧臺毋
稍延誤至見在襄陽匪徒滋事道路戒嚴山西解餉委員著飭令
取道南陽至棗陽縣所屬之張家集前進陝西委員或由商州至

荆子關入楚徑至光化縣尙無梗阻著各該撫於起解時派員分投確探一面飛咨官文等迎提以昭慎重將此由五百里各諭令知之○諭扎拉芬奏俄夷遣官會議燒失貨物案內大概情形一摺此次該夷官來至伊犁不肯領回燒贖貨物專以議賠爲詞顯與通商章程不合該將軍等據理折辦所辦甚是民夷互有爭執必應先論事理曲直方能平情判斷今此案啟釁根由旣由該夷驅逐金夫殺斃民命所致咎由自取况燒搶貨物之犯業經嚴拏治罪兩造已可相安豈有不論案情但索賠償之理著扎拉芬泰等密加體察如係匡蘇勒官從中播弄卽一面咨行該國西畢爾衙門詳細告以曲直原委令其諭知遣來之夷官一面向該夷官明白開導使不至爲浮言所惑總須堅持定議不可允其賠償卽將來萬不得已或有設法貼補該夷之處亦不可居賠償之名

致壞成約其措詞一切務宜平心靜氣勿致滋事生端將此各諭令知之○丁丑諭內閣前據大學士文慶等進呈前任巴里坤領隊大臣三等侍衛孟保繙譯大學衍義一書當交鑲黃旗漢軍校刊並派侍郎穆蔭協同校閱茲據文慶等奏稱督同繙書房司員等詳加校訂並發交該旗印務章京會同孟保刊刻成書朕覆加披閱均係欽遵乾隆年間 欽定繙譯四書五經通鑑各按新語詳加釐定因思宋臣真德秀此書因大學條目纂集經史考證得失於聖學治道均有發明康熙十一年間我 聖祖仁皇帝特命翰林院掌院學士福達禮等繙譯頒行願其時滿洲新語未備引用經史皆係舊語對音切字有未經繙成文義者又止清文單行未及增註漢字今既引用新語又成滿漢合璧開卷瞭然洵足爲士子編摩之助著將刊板交武英殿刷印頒行俾在京八旗及各

省駐防同資講肄用副朕稽古同文精益求精至意○戊寅以程

庭桂爲左副都御史

前任左副都御史

○己卯諭軍機大臣等前因御史

錢以同奏江蘇省官吏賣荒舞弊當經降旨著該督撫嚴查懲辦
本日復據御史張雲望奏請嚴禁江蘇州縣浮報荒數並捏造抽
換花戶名冊一摺據稱該省州縣於荒數則浮報於完糧之花戶
名冊則捏造抽換其弊總由解存司庫之串根民間不得而知藩
司亦無從覈對故熟田可浮報爲荒而徵收以入己獨免之糧可
不註荒而勒令完納其應緩者復豫徵之而假民欠爲詞展轉延
宕終歸無著以致課額不裕民困不蘇玩法殃民實堪痛恨著怡
良趙德轍將該省州縣所報荒數查勘確實並令州縣於完糧串
冊造成後先行解司於騎縫蓋用藩司印信以清積弊儻州縣有
浮報荒數卽著嚴參懲辦該御史另片奏蘇省見因亢旱河水盡

涸請於見在收養之流民內擇其丁壯開濬河道爲以工代賑之舉並著該督等體察情形設法籌辦原摺片均著鈔給閱看將此諭令知之○諭戶部奏遵旨速議籌撥黔餉一摺據稱請先撥銀二十萬兩在於山東各省款內籌解並擬請飭廣東將前撥協黔銀兩陸續起解等語貴州例放兵餉自上年夏季至今未發情狀實屬窘迫著照戶部所請在於山東河南陝西應解京餉項下各籌銀五萬兩四川無論何款籌解銀五萬兩其湊成二十萬兩之數山東河南距黔較遠恐所撥銀兩一時未能解到著先由四川陝西無論何款各籌墊銀五萬兩就近解黔以資接濟並著樂斌吳振械英桂崇恩卽將所撥應解應墊各項銀兩刻卽委員解赴貴州毋得藉詞延宕其四川陝西籌墊銀兩仍著山東歸還陝西銀五萬兩河南歸還四川銀五萬兩迅速起解以清款項至廣東

應解貴州餉銀本有籌備協黔軍餉銀二十萬兩尙有壬子年撥潮橋引餉未解銀五萬兩乙卯年應解銀六萬兩丙辰年應解銀二十五萬兩亦應一併籌撥惟爲數甚鉅著葉名琛將前項銀兩陸續起解俾得源源接濟以應要需將此由五百里各諭令知之○庚辰諭軍機大臣等奏定三奏連日進攻情形請添兵助剿一摺據稱該提督於八月三十日移營陳家鋪進攻桐城東門九月初一日至十二等日連次接仗互有殺傷見在安徽潛山太湖之賊紛紛來援所統官軍僅一千名兵力太單義勇又難期得力請飭福濟等就近撥兵二千名助剿等語福濟等見攻巢縣原須厚集兵力惟桐城爲安慶門戶亦關緊要自應皖左皖右併力籌攻以分賊勢奏定三所統僅貴州兵一千名實屬過於單薄著福濟鄭魁士挑選得力兵勇二千名派員帶赴桐城聽候奏定三調遣

儻不能足二千名之數亦須挑派一千數百名前往以資攻剿毋稍遲誤將此由五百里諭知福濟鄭魁士並諭秦定三知之○諭官文奏請飭湖南省招商販運米穀接濟民食兵糈等語據稱湖北各屬夏秋亢旱客米來源稀少價值過昂兵民糴食維艱該省向賴四川湖南兩省客米接濟川省近歲收成亦歉無米到楚惟湖南年穀屢豐足資運濟著駱秉章出示曉諭飭屬廣招商販起運米糧前赴湖北售賣所有商船經過關卡應納稅項釐金均著一體免其完納隨時給照放行俾得源源接濟不至缺乏將此由四百里諭令知之○辛巳諭內閣河南巡撫英桂督辦三省剿匪事宜未能躬履行間出境調度以致匪蹤四竄日久無功實屬辦理遲延英桂著先行交部議處○諭軍機大臣等英桂奏官軍剿匪失利陳州戒嚴並懇陳皖軍呼應不靈各一摺英桂身爲三省

總統勦辦擒匪屢經諭令督兵出境乃該撫始終株守陳州徒以呼應不靈諉咎於南路皖軍郝光甲等遷延觀望誠屬咎有應得而如崇安此次之接仗失利則並未參奏豈得謂之賞罰嚴明總由該撫不能親臨行陣以致各路將士無所畏忌功則歸己過則歸人似此毫無把握何日蕺事本日已將英桂先行交部議處以示薄懲見在擒匪已逼近陳州若再不出境迎勦必將該撫從重治罪崇安明係敗退幸賴馬隊救援乃云鈔出賊前殊屬可笑著英桂嚴飭該總兵迎頭截擊不准藉口耽延袁甲三此次亦未見跟蹤追勦是否已由鹿邑進兵並著速行咨催以期前後夾擊至另摺所陳郝光甲等耽延情形經該撫參奏後業經革職示懲何得謂非該撫所能調遣若將該鎮將等同時撤回亦非臨敵所宜見在皖省大員惟秦定三久歷戎行尙堪爲各鎮表率俟桐城勦

匪接手有人擬令前來統帶皖省兵勇會同英桂勦辦此時自應仍令該鎮將等由東路兜剿若始終不能得力卽據實嚴參朕必執法懲治英桂但當一秉大公自足服將士之心若仍前玩泄則鎮將之不力卽該撫調度乖方恐不能當此重咎也將此由六百里諭令知之○諭據英桂奏擒匪西竄陳州戒嚴並皖北兵勇請飭另派得力大員統帶等語擒匪自潁州回竄以後勢日猖獗見復全股西竄窺伺陳州總由皖豫官軍未能合力兜剿英桂未能躬親行陣以致日久無功已降旨先行交部議處並諭令該撫親督兵勇出省勦辦矣陳州南北兩路經英桂飭令徐宗幹袁甲三等分投堵擊惟東路花溝集三丈口等處爲擒匪屯聚之所必須得力兵勇從後進攻雖據英桂檄令郝光甲珠克登等進剿該革員等遷延觀望習爲故常皖兵無總統大員其勢甚爲散漫福濟

又因攻剿巢縣不能前往因思秦定三久歷戎行且係提督大員
可以統領各鎮前因桐城一路兵力太單曾諭福濟等撥兵助剿
著卽揀派可靠大員將所撥兵勇管帶前往桐城接辦剿匪事務
卽著傳旨令秦定三馳赴蒙城將郝光甲珠克登塔思哈等善爲
調度俟福濟奏到時再行明降諭旨派該提督會同英桂剿辦擒
匪以期南北兩路各有統率之人不至互相歸咎於軍務尙堪補
救至郝光甲等見在帶兵仍當責令立功自效儻始終不能得力
卽將該革員等撤回大營奏請治罪再據英桂奏協濟皖省米麥
二萬石見已備齊因運糧道路匪蹤出沒請飭皖省派員迎提較
爲穩妥等語著福濟卽派妥員赴豫將此項米麥兌收並確探道
路應由何處行走俾無貽誤將此由六百里諭令知之○壬午諭
內閣易棠奏剿除番族賊匪生擒首惡並分捕餘匪一摺甘肅拉

安族黑番糾結四川果洛克等番族占據青海蒙古游牧並敢竄擾嘉峪關外搶劫餉鞘摺報經該提督索文親率兵勇會同西甯辦事大臣東純馳往勦捕八月初四日該提督帶兵直抵番族插帳之雪山奮力攻擊自卯至酉殲斃甚多復分兵繞至山後於初五日黎明直擣番帳生擒賊目達洛尖齊等二十三名官兵大隊四面環攻其計斃賊一千餘人滾崖落澗者不計其數搜獲被搶原贓並奪獲帳房鞍馬牲畜軍械無算立將該族番賊勦洗淨盡此次該提督等勦捕番賊蕺事妥速案文東純均著交部議敘出力官弁兵勇准其擇尤保奏所有動支經費既由該提督等籌捐還款著免其造冊報銷捐輸各員並准其奏請獎敘○諭軍機大臣等前經諭令江浙兩省各諭護運火輪船飭由圖山關駛入大江交德興阿等調度茲據怡良何桂清趙德轍奏浙江輪船已於

七月底到滬江蘇紳董復另購小火輪船一隻見飭整備齊全卽行自滬啟碇等語此項船隻雖據聲稱係商火輪船不及兵火輪船之堅利而靈巧整齊已較內地船隻爲勝以之駛行江面焚燬金山賊隄攻克瓜州綽有餘力著德興阿翁同書卽日派員前往三江口一帶催提入江卽交狼山鎮總兵泊承陞等委弁引帶駛赴上游並於陸路派兵接應先將金山賊隄盡力攻洗以期水陸兩路進克瓜州如果入江後並無阻礙勦辦有效再由怡良等酌量添購與紅單船相輔而行沂流上勦以清江面將此由五百里諭令知之○諭前據樂斌奏調撥川兵一千名交署參將鍾琦統領由西陽秀山赴黔與蔣玉龍會合進勦俟苗匪蕩平後此項官兵應否由黔赴鎮遠與韓超等兵協同防勦勢不爲孤雲南回匪勾結獠人極爲猖獗見在大理府失守省城亦爲震動較黔省情

形倍形喫緊請速調四川兵二千名由霑益進剿等語雲南回匪
蔓延通省自應迅速添兵助剿既據恆春奏稱蔣玉龍一軍無須
協助著樂斌卽將鍾琦所帶兵一千名改撥雲南並另選精兵一
千名連前項官兵共湊足二千名之數剋日啟程由霑益一帶相
機進剿四川兵練調撥過多惟見在滇省情形萬分危急該署督
務於無可抽撥之中如數調往以資助剿將此由六百里諭令知
之○易棠以病免以樂斌爲陝甘總督由成都將軍還未到任前以甘肅
布政使常續護理賞張集馨四品頂帶署甘肅布政使已革直隸布政使
○是月賑山東河南江蘇安徽浙江災民銀米緩徵河南睢州濟
源縣額賦奉天開原牛莊白旗堡三處被淹旗地額賦蠲緩江西
蓮花等二十二廳縣江蘇碭山等二縣並徐州衛被災莊屯額賦
蠲免河南商邱等七縣被兵地方漕糧

東華續錄

咸豐六十五

臣王先謙敬編

臣陶濬宣恭校

冬十月乙酉朔享 太廟○諭軍機大臣等福濟等奏懷遠蒙城

一帶勦賊喫緊請飭英桂迅令伊興額帶馬隊五百名前往助勦等語此項馬隊官兵已據英桂奏俟察哈爾官兵到後酌量分撥見在察哈爾官兵當已陸續趕到著英桂卽飭伊興額將所帶馬隊迅速赴懷遠一帶助勦並據福濟奏水陸賊援由裕溪神塘河窺伺東關滋擾無爲巢城之賊尙有數萬請調察哈爾馬隊一千名來巢聽候調遣等語著英桂於察哈爾官兵到後酌撥五六百名傳旨令穆騰阿管帶迅赴皖省以資攻勦將此由六百里諭令知之○諭福濟等奏攻勦喫緊請添調山東青州滿洲營兵五百

名兗州鎮標兵五百名前往助剿自爲賊眾兵單不敷調撥起見
皖省剿匪正當得手急應厚集兵力著崇恩察看情形能否於青
兗二處如數撥往或酌抽精銳數百名赴皖協剿之處迅卽遴員
管帶並整備軍裝器械飛速啟程交福濟等調遣毋稍延誤將此
由六百里諭令知之○丙戌諭內閣恆春奏台拱黃平失守自請
嚴譴一摺據稱貴州苗匪肆擾黃平州城於九月十一日夜間被
賊攻陷台拱廳城亦於八月二十六日失守恆春等督兵剿辦調
度無方實難辭咎恆春蔣霽遠均著革職畱任速飭在事文武將
失陷城池次第收復儻再事延玩必將該督撫從重治罪懷之○
諭軍機大臣等苗匪自攻陷都勻後失守地方已復不少旣陷者
固宜亟籌收復其偏近寇氛處所尤應竭力保全毋使再有失事
台拱去鎮遠較近設匪眾由該廳蔓延郡城則川楚要道悉致阻

梗於該省全局殊有關繫孝順已移營進攻文德與巴揚阿約攻都勻其如何速籌東下援應鎮遠卽著該提督斟酌緩急辦理仍一面催令蔣玉龍韓超等督飭兵勇實力攻剿務宜保全鎮遠並兼顧舊州等處毋許再有疏虞恆春如已回滇貴州軍務歸孝順總統蔣霽遠身任封疆責無旁貸著與孝順熟計妥籌亟圖補救毋得仍前玩泄自干嚴譴台拱黃平文武下落卽著查明具奏將此由六百里加緊各諭令知之○革河南巡撫英桂職暫畱任○丁亥怡良奏句容逆匪於我兵紮營張家莊後添築東南城外營盤死守九月初六日鎮_臣張國樑派遊擊劉季三等分攻各門三路齊進劉季三等正攻北門遊擊戴文英等直進東門外關廂街上斃匪多名追至近城關橋方欲奪橋而過該逆忽於南門添出大股包鈔我兵少卻副將吉連等飛往援應張國樑裹創馳往手

斬退縮兵勇三名遊擊李春寅等會同吉連兩路夾擊張國樑親督各軍從旁鈔剿逆眾竄回而北門山梁之賊膽敢乘勢壓下劉季三等復督勇衝殺斬獲甚多該逆始退回城十一日我軍移營至離城三里地方該逆屢次出撲均經我軍擊退十四五等日逆匪大股分路撲來並先於吉利村伏賊接應張國樑親督參將李若珠等馳往迎擊斃賊甚多而我軍將弁亦多受槍傷仍復奮勇鏖戰該逆又於東北兩門各出千餘人撲我營盤經副將王浚等擊退忽出賊二三千人分股猛撲另由南門出賊三四千人又有馬步賊四五千分作六股繞過都司陶茂森營後勢甚兇猛明安泰卽派遊擊李春寅等分路迎剿未能得手張國樑親督兵勇並分軍衝擊斃賊不計其數追至吉利村伏賊暗施槍礮我軍受傷多人各兵憤極分隊包鈔當將伏賊擒斬百餘名賊拌死奔回

此攻剿句容逆匪之情形也。傅振邦進紮蒲塘後，親督官軍直抵溧水縣城濠邊，奮力仰攻，並製備攻城器具。一面移營進紮中山，該逆分股來撲。參將李定太首先衝入賊隊，立斬黃衣賊目一名。虎嵩林督兵鈔襲斃賊無算。該逆猶敢分股出撲，復經遊擊虎坤元等兵勇擊回，斬賊多名。各軍分路進攻，搶過城濠，毀賊城上望樓。賊仍放槍礮死拒，並出賊千餘人鈔襲我軍。經虎坤元等截擊斃賊無數。傅振邦督兵追剿，直抵城根。該逆閉門死守，其分股鈔襲我軍之賊千餘人殲除殆盡。此溧水剿匪之情形也。查句容溧水二城該逆占踞，與江甯勢成犄角。見經張國樑、傅振邦等兩路進攻，挫其兇鋒。亟應乘此銳氣，激勵兵勇，迅圖克復。又奏查僞北王韋逆由丹陽敗回金陵，楊逆閉門不納。逆首洪秀泉開門放進，因此起釁，互相戕殺。又楊逆向洪逆索取僞印，意圖并吞。洪逆

將韋逆調回殺死楊逆及其親屬僞易王石達開聞信趕回與韋逆又起爭端石逆逃赴上江糾集黨與欲圖報復所聞不一而其內亂則不爲無因惟韋石二逆尙各擁眾數萬分踞各城負隅死守我若徑擣金陵該逆必合而爲一是以臣等仍攻句容溧水期在必克先翦其枝葉以杜內犯張國樑見派精細間諜潛入賊中設法離間散其黨與上諭軍機大臣等該逆負隅死守未能卽時克復和春見已接受欽差大臣關防卽可乘我兵銳氣督飭各路將弁迅速進剿怡良仍回常州駐紮以爲後路防範見在洪逆殺死楊逆雖探報情形不一而賊匪內亂當屬可信怡良等以石逆有前往報復之謠若徑擣金陵恐該逆急則復合是以佯爲不知力攻句容溧水先行翦其枝葉所見甚合機宜張國樑見派間諜潛入賊中設法離間散其黨與和春等一面攻克兩城一面偵

探金陵消息如有可乘之機卽行馳奏此次溧水斬獲較多句容
勝仗我軍亦多受傷想該逆精銳盡在句容如能克復此城盡殲
醜類則兇燄漸消若火輪船入江奪取金山則瓜州在我掌握之
中而鎮江賊勢亦蹙和春等務當趁此機會與江北德興阿等聯
絡一氣迅奏膚功朕實不勝盼望將此由六百里各諭令知之○
諭容照奏州城危急請飭撥馬步官兵會剿一摺宿州境內捻首
李大澹等股數甚多見已繞至西北鄉一帶逼近城垣十餘里肆
行搶擄且聞五旗捻匪合股來犯宿州西北團練迎敵失利濉溪
口又有失守之信勢必併力窺伺州城雖經容照將署遊擊恩臨
及署知州才宇和調回協同守禦而出剿無兵情形實屬危迫昨
據福濟等奏郝光甲珠克登等在懷遠疊獲勝仗匪勢漸衰此時
惟有移緩就急將該總兵北路兵勇酌量抽撥數百名飭赴宿州

交容照探匪所在實力勦擊庶足以挫兇鋒不得株守州城止圖自衛至福濟等奏請添兵助剿昨已諭令崇恩於青兗二處酌抽精銳交福濟等調遣並諭英桂飭伊興額馬隊速赴懷遠再調撥察哈爾兵五六百名令穆騰阿管帶赴皖該撫卽飛飭郝光甲等剋日啟程毋許藉詞延宕容照片奏周天爵之子周光岳訓練有方請飭督辦團練等語著照所請辦理將此由五百里諭知福濟鄭魁士並傳諭容照知之○命西安將軍福興馳赴江西會同曾國藩文俊辦理軍務○己丑賜王世清等三十八人武進士及第出身有差○諭軍機大臣等本日據載增等奏襄陽逆匪復回撲樊城見催各路官兵進剿一摺據稱匪徒由樊城退去竄入光化縣境窺伺老河口並由馬家集竄赴襄陽縣境呂堰驛焚掠復至離樊城十餘里之李家樓滋擾此股匪徒膽敢勾結黨與肆行焚

掠遊擊溫發魁等兵勇迎擊復遭挫折匪勢猖獗已極必應及早撲滅毋令蔓延官文前派常恩帶馬隊九百名諒已馳抵樊城卽飭該道會同馬秀儒等奮力攻剿並著官文察看情形如兵力尙單卽由大營添調兵勇馳往協剿或常恩帶兵未能得手卽另派得力大員統帶該大臣等一面催兵剿捕一面仍遵前旨督飭地方官將被脅貧民設法解散以孤賊勢荊州重地責成載增富森嚴密設防勿令該匪乘間竄越該署將軍等見催署松潘鎮德恩酌挑精銳官兵赴荊以爲後應此項川兵仍應飭令相機前進不可株守一隅致滋貽誤將此由六百里各諭令知之○庚寅諭軍機大臣等和春奏請飭江蘇派員稽查糧臺報銷辦理釐捐等語軍興以來時逾數載軍需浩繁自應隨時造報以重帑項除廣西委員辦理糧臺前在九江交卸應由該省造報外其自咸豐三年

春間由九江以至江南迄今三載有餘糧臺支發用款尤多卽著
責成總司糧臺之彭玉雯熊莪逐款清釐卽由江蘇督查趕緊造
冊報銷以後江南糧臺一切收放事宜著怡良等揀派公正司道
大員就近督辦隨時稽覈並委員辦理釐捐仍責成各糧臺覈實
報銷勿稍混濫至江南軍營勇目繁多委員冗雜自應查明裁汰
卽著和春隨時訪察分別去畱毋令濫竽充數將此由五百里各
諭令知之○諭英桂奏大股捻匪退回渦河見籌防剿一摺此次
捻匪西竄窺伺陳州英桂卽當督飭各路官兵設法兜剿乃僅自
守疆圉崇安距城駐紮並未接仗迨該匪由安平集紛竄英桂又
未派兵會合爲前截後追之計恒怯情形豈能掩飾崇安前此敗
退已屬罪有應得此次追剿又藉口道路泥淖任賊遠颺殊堪痛
恨見該匪退回渦河崇安與袁甲三兩軍均在亳州一帶駐紮未

能偏近賊巢著英桂飭令迅速前進毋任遷延該撫卽未能衝鋒陷陣亦當移營前進親督後隊以爲各路聲援俟奏定三督兵前來卽可會商勦辦機宜將各股捻匪次第剪除以靖地方儻崇安等仍前玩泄卽著從嚴參辦毋稍徇隱將此由六百里諭令知之○諭貴州逆匪趙子澐等聚眾煽亂脅令五硐十二鄉居民助給錢米已據恆春奏報咨調鎮筵鎮精兵二千名前往銅仁援勦諒駱秉章業已照咨辦理茲官文奏據辰永沅靖道瞿誥稟稱探知五硐地方均係從賊並無受撫之心見在三角莊豎立木城趕造火器欲於秋後入楚聞黔省地方官專意主撫勢必滋蔓難圖等語蔣霽遠不能綏靖疆圉獲咎已重若一味姑容令其竄入鄰封則貽誤之罪豈能再從寬宥著卽飭令蔣玉龍韓超等痛加殲洗不得專主招撫致該匪益滋猖獗並著駱秉章卽飭所調援兵二

千名星速赴黔相機協剿並於辰州常德地方一帶嚴密防範毋稍疏虞將此由五百里各諭令知之○諭官文胡林翼奏武漢軍餉不支請飭廣東省籌撥銀三四十萬兩分批馳解等語據稱武漢功在垂成餉需竭蹶若不趕緊接濟必致軍心渙散所奏自係實情惟所請撥餉三四十萬兩爲數過多各處軍餉均須粵東協濟恐一時無此鉅款著葉名琛迅籌銀十餘萬兩派委妥員陸續解往湖北交官文等軍營應用毋稍遲誤將此由六百里諭令知之○德興阿等奏瓜州自前月水陸會攻大勝後逆眾已成內訌之局其黨與有自拔來歸者聞江南情形亦係如此見與和春密議南北剿辦事宜總期和衷共濟相與有成得旨汝等與和春務必事事和衷勿分彼此以期迅殄妖氛瓜州逆匪既自相殘殺時不可失散黨與行離間皆屬要著○官文等奏襄陽匪徒竄踞樊

鎖飭調馬步兵勇馳往剿辦生擒習教匪首朱中立訊明正法一面示諭解散脅從得旨匪首旣已就戮尤應以解散脅從爲第一要著○河南巡撫英桂奏西竄擒匪回踞渦河南岸擬俟陳郡一帶人心少定卽行拔營前進相機督辦得旨觀汝遲遲不進實屬大負委任雖爲統帥惟知自守疆域迹似持重心實畏葸視汝平日政績判若兩人豈昧於事機抑置屢次嚴諭於不問何竟憤憤若是耶○壬辰福濟鄭魁士奏巢縣逆匪恃眾負嵎城外賊壘聯絡九月十六日裕溪口駛入賊船數百隻援賊萬餘臣等派副將扎隆武等馳往闌截行至東關青溪之間遇賊接仗殲斃多名我兵於姚廟岡放王岡一帶紮營遏賊來路二十三日南門大股賊匪四五千入直撲新營官軍分投迎剿擊斃賊目五名臣鄭魁士忽被礮子打傷肩脊仍復裹創力戰眾兵齊力衝殺斃賊一千餘

名二十四日各門之賊夤夜出撲麟瑞等開放排槍斃賊無數二十八日扎隆武等在放王岡紮營派隊分攻賊壘賊由夏家橋燒廟岡旗山三路共出馬步賊數千人直前馳驟諸軍嚴陣以待吉順馬隊從旁兜襲各兵勇盡力砍殺斃賊一千餘名賊勢大潰自辰至申鏖戰竟日大西門賊營亦經肅開甲等填濠直進斃賊五六百人乘勢將城根二壘毀平分圍南門東門賊營五座我兵拋擲火器該逆驚竄各軍一齊攻進奔潰之賊落濠死者不可勝計

臣福濟督同吉順等攻小西門北門小東門臣鄭魁士督同麟瑞等攻大東門南門大西門並分兵暗襲姚廟岡石壘堵遏湖口湖中賊船連檣而下我軍先用漁船裝載火藥順風開放焚燒賊船幾徧賊眾驚駭我軍復連開大礮立沈多隻該逆紛紛落水屍平湖面礮械悉沈水中逃賊登岸匿伏復經接殺多名其時城賊見

湖賊已敗仍踞各門死守我軍突放火箭延燒更棚數處適楚廣各勇已抵姚廟岡賊壘殲擒甚多該逆棄營逃竄眾勇追殺聲振山谷臣等見我軍得手親督諸軍各豎雲梯奮勇前進江忠信于昌麟余成蛟馬昇平等均已登城後隊繼進殺賊百餘名餘悉奔潰我軍追殺賊屍枕藉東門之賊縱火衝出馬隊追剿斃賊極多遂於二十九日將巢縣城池克復其竄出之賊經麟瑞吉順扎隆武等分由南北兩岸追剿復殺斃數百名其倖逃者由黃落河岸分竄復經鄉團截殺殆盡統計數日之間奪獲賊營十三座礮臺十座賊卡二十餘處槍礮刀矛旗幟四千餘件斃賊七千餘名燒毀賊船一千餘隻生擒僞將軍周擁和僞旅帥林壹分據供僞指揮黃逆在東門街口殺斃僞尙書林逆僞將軍蕭逆亦被焚燒訊明後卽將該逆梟示巢湖已無賊蹤統計廬州府屬合肥舒城廬

江無爲巢縣各城均已次第肅清 上諭內閣福濟鄭魁士奏水陸兵勇大捷克復巢縣城池一摺巢縣逆匪恃眾負隅聚糧固守經福濟等親督兵勇圍攻將士用命立克堅城廬州所屬合肥舒城廬江無爲等處均已次第肅清覽奏實深欣慰福濟鄭魁士均著交部從優議敘並發去御用陀色棉袍一件白玉喜字翎管一枝白玉搬指一箇大荷包一對小荷包四箇交福濟祇領御用藍色棉袍一件白玉喜字翎管一枝白玉搬指一箇大荷包一對小荷包四箇交鄭魁士祇領鄭魁士躬冒鋒鏑身受礮傷猶復督兵力戰實屬奮勇可嘉著賞給如意拔毒散趕緊敷治首先登城之江忠信于昌麟余成蛟馬昇平著與此次出力文武員弁兵勇分別保奏候朕施恩○諭軍機大臣等前因皖省需兵諭英桂飭調伊興額馬隊赴懷遠協剿再酌撥察哈爾兵五六百名交福濟等

調遣並諭崇恩於青兗二處抽撥精銳官兵赴皖茲據福濟奏巢縣於九月二十九日攻克須派重兵扼守又懷遠雖已解圍而捻援大集必須迅添馬隊據伊興額稟稱該員在徐原帶兵悉在毫營懇請咨調願充前隊各等語勦辦捻匪馬隊最爲制勝伊興額所帶五百名旣在亳州著英桂懷遵疊次諭旨撥交該侍衛統帶馳赴懷蒙會勦其察哈爾馬隊並著遵旨迅撥五六百名交穆騰阿帶往廬州毋得藉詞延宕至前調山東青州滿洲營及兗州鎮標兵前赴安徽尙未據崇恩覆奏見在廬江巢縣等處次第克復均須撥兵防守著崇恩迅速抽調派委得力將弁管帶啟程毋稍遲誤將此由六百里各諭令知之○以安徽辦團勦匪出力予布政使畢承昭優敘實授恩錫按察使○以廬江縣生擒逆匪段立剛實授府經歷何輝級廬江縣知縣○以團練協助勦賊免巢縣

節年應徵額賦○甲午諭軍機大臣等英桂奏移營前進並畱兵
防守陳州一摺捻匪大股旣在渦河南岸屯聚官軍若專駐亳州
仍未能偪近賊巢該撫見旣移營前進自可與袁甲三合兵一處
鹿邑附近匪眾不過零星小股亟應迅圖撲滅節節疏通剋日會
兵東剿前據該撫奏亳州以南久已民賊不分若必俟搜捕淨盡
始行進剿則官吉寺一帶大股匪徒又將養成羽翼勢益鴟張察
哈爾官兵不日即可到齊除撥赴皖省五六百名外尙有一千四
五百名爲數不少此項馬隊到營銳氣方盛該撫卽當妥爲調度
速行進剿總期於明歲春融能令歸伍方不至用違其長至周家
口地方最關緊要該撫所派張惟翰馬春華等能否得力務飭嚴
密防堵不准稍有疏虞另片奏襄樊土匪窺伺新野官軍失利等
語該縣爲南陽門戶慶德所帶兵勇如果不敷剿辦卽著飭令邱

聯恩帶兵前往但陳州一帶又須另派得力大員駐守該撫務當斟酌緩急安速布置萬不可使此股土匪與泌陽桐柏等處捻匪勾結仍飭該府縣隨處搜查先清內患以絕根株將此由六百里諭令知之○乙未諭軍機大臣等奏定三奏剿辦桐城賊匪疊次大獲勝仗一摺前因桐城兵力單薄諭令福濟撥兵二千名或一千數百名前往助剿嗣以皖北剿捻喫緊復諭福濟派員前往桐城接辦剿匪事務傳旨令秦定三馳赴蒙城會同英桂督率各路鎮將剿捻尙未據福濟覆奏本日秦定三奏桐城擊賊大獲勝仗惟賊眾既多勢尙兇悍急須添兵撥餉以圖克復未知福濟接奉前旨已派何路兵勇前往桐城並派何員統帶可令秦定三交卸馳赴蒙城儻一時無可靠之員堪以接辦而見在桐城將次攻克卽著暫畱秦定三奮勇攻剿迅將桐城克復再行前赴蒙城如桐

城一時未能卽下而帶兵攻勦業已有人接手則捻勢方張會勦亦不可緩仍著秦定三前往會同英桂辦理勦捻事務毋爲桐城一邑牽掣著福濟秦定三妥商辦理不至顧此失彼爲要將此由六百里諭令知之○永定河北岸合龍○丙申諭軍機大臣等武漢逆賊負嵎已久據官文胡林翼奏報疊次擊敗大股賊援城中之賊勢已窮蹙是兩城計日可克乃南岸自八月初七日擊敗石逆以後兩月未見動靜北岸自八月二十一日擊敗下游援賊以後亦但以嚴遏外援爲詞何以於進攻機宜仍復漫無把握見聞金陵城內賊黨相殘楊逆被洪韋二逆所殺石逆不服逃出金陵洪逆懸賞購石逆首級是石逆之不返金陵已可概見此等傳言湖北當有所聞若不乘此機會迅拔一城僅石逆不附金陵自圖占踞必至率其死黨或撲湖北或走江西皆屬可慮見在餉需日

缺調撥維艱所望克復上游卽可移師東下由九江而至安慶由安慶而至金陵乘其內亂次第削平兵餉可不加增而成功庶幾有望官文胡林翼身膺督師重任須當統籌大局謀勇兼施何得以城堅賊悍爲詞坐擁水陸重兵日久無功若云斷絕接濟可以困賊何以爲時已久尙未蔽功恐沿江一帶港汊紛歧接濟仍未能斷絕不過藉口耽延掩其遷延之咎經此次剴切申諭後該大臣等卽當嚴督在事將弁設法進攻迅將兩城克復俾得分兵東下大局冀有轉機如敢仍前延玩必致師老力疲別生變故官文等不能當此重咎也將此由六百里各諭令知之○諭官文奏請挑選西丹來楚等語湖北軍營所有吉林黑龍江各起甲兵傷亡出缺並無西丹補充見在攻剿武漢喫緊馬隊官兵最爲得用未便懸缺無補致減兵力著景瀄奕山於各該處認真挑選西丹各

一百名派員管帶赴楚如挑選不能足數卽著該將軍等酌量情形辦理並令將各該處見有馬匹乘騎至京再由京另行換馬赴楚毋稍延緩將此各諭令知之○德興阿等奏瓜逆受創後時有乘間投誠者別設一營派員約束仍當離其黨與力圖擣穴得旨離其黨與固爲上策然須事事示以不疑密爲防範庶不至墮其計中瓜州與連鎮不同尤應慎益加慎○調沈兆霖爲工部右侍郎以張祥河爲吏部右侍郎前任吏部侍郎○丁酉諭內閣福濟奏遵覆擬辦實行團練章程一摺前據文慶等奏請飭各直省實行團練疊經諭令直省督撫各就地方情形酌辦並將擬辦章程迅速具奏茲據福濟奏稱該省自被賊竄擾以來各屬辦理團練助剿協防如除泗徽甯鳳潁等府州屬均各著有成效歷次將出力各官紳等奏請獎勵見復飭屬一體遵行責成州縣專管知府直隸州

知州督辦並就該省見在情形酌擬將安廬六滁和五府州鳳穎
泗三府州歸按察使及廬鳳道分統稽查由該撫調度徽甯池太
廣五府州歸徽甯道統理稽查由見駐徽甯之已革巡撫張芾調
度該司道及知府直隸州知州分別加督辦團練協理團練等銜
如能卓著功績力保地方隨時查明保奏給予升轉其州縣因團
練防剿保至知府同知直隸州知州者均各畱本任並加協理團
練銜以示優異該司道皆帶有兵勇毋庸另撥亦毋庸另派大員
巡視辦團各紳由糧臺酌予銀兩毋庸由部議給廉俸其有情殷
報效者或加學額或給獎敘分別辦理等語均著照所擬辦理安
徽地方見當剿辦賊匪喫緊之際團練尤爲要務該撫當慎選賢
能督率公正紳士實力舉行其各屬編查保甲仍飭一律遵辦毋
得日久生懈有名無實至各省情形不同尙有未經奏覆者該督

撫等仍各妥爲酌擬將辦理章程迅速具奏毋涉玩延○諭福濟
鄭魁士奏官兵進攻連獲勝仗克復和州一摺安徽官兵自攻克
巢縣後經福濟等催令總兵音德布進攻和州直抵城下滇兵奮
勇進攻施放火箭噴筒立將西樓焚毀本城難民齊聲殺賊我軍
竭力斬擒斃賊無算並槍斃僞僕射一名生擒三十一名餘匪開
東門潰逃追剿至鍼魚觜江口擁擠落江不可勝計當將州城克
復此次官兵連克城池辦理尙爲得手著卽迅速進兵盡殄羣醜
毋畱餘孽在事出力員弁官紳兵勇著福濟等查明保奏候朕施
恩○諭舒興阿奏大理回匪戕官踞城情形並自請嚴議一摺雲
南大理府城於八月初九等日漢回互相燒殺城外各村寨及下
關一帶亦同時起事大理府知府唐惇培捐募練勇分投救援十
七日賊添外回千餘鄉練漸散賊遂閉城拒守見經該撫等撥兵

選練分投進攻著卽督飭在事員弁迅速攻克毋稍稽延舒興阿
未能先事豫防著交部議處恆春督剿黔匪尙未回滇著加恩免
其議處唐惇培著先行革職仍責令戴罪自效並著查明有無規
避情事分別參辦○諭軍機大臣等福濟等奏克復和州並撥兵
馳援桐城請飭紅單船協剿等語巢縣克復後我兵復乘勝攻拔
和州剿辦已有轉機惟西梁山芝蔴河一帶尙有賊壘業派吉順
等在彼堵剿神塘河賊營雖經李德麟踴毀而該副將所帶僅止
紅單快蟹船十四隻上下游不能兼顧係屬實在情形總兵吳全
美紅單船四十餘隻見泊蕪湖上游魯港地方此時福濟等陸路
進剿之兵正在得力急應水陸兼攻俾江北肅清則江南亦易於
剿洗著和春德興阿卽飭該總兵紅單船聽候福濟等調遣和春
等務當統籌全局與皖省會商辦理捻匪尙在蒙亳懷遠等處往

來嘯聚英桂各軍未能大挫其鋒已諭令秦定三前往會同督辦
惟桐城賊勢方張福濟等已派調吉林熱河馬步隊兵二千餘名
陝甘兵五百名前往協剿著秦定三俟援兵到後卽行馳赴亳州
勦擒福濟因貴州兵一千名向隨秦定三打仗出力擬仍歸該提
督帶往而以見在勦擒之川兵及宣化兵令塔思哈俞應彪管帶
回營但恐秦定三不敷調遣或於此項川兵宣化兵內酌畱數百
名交秦定三統帶不必盡數調回據福濟奏有石達開見踞安桐
之語朕聞金陵賊黨內亂楊逆被殺石逆不服逃出金陵洪逆見
懸重賞購其首級石逆之不返金陵金陵之不助石逆已可概見
旣據該撫探知該逆見在安桐一帶急當乘其眾心渙散之時督
飭兵勇一鼓殲擒該逆素稱兇悍如能滅此巨憝則沿江地面卽
可漸次埽蕩儻仍任其他竄則彼旣不附洪逆必致自圖占踞聞

江西瑞臨等郡該逆皆派其黨與死守若使竄往江西鴟張更甚福濟等務當盡力堵剿勿令鋌而走險又聞石逆本有投誠之意恐非確信此輩狼子野心斷難輕議招撫惟當密布間諜偵探實情多方設法散其黨與以孤其勢仍不動聲色督兵進剿該逆諒必有窮蹙之時也福濟等前請飭調山東青兗兩處官兵本日據崇恩奏該省存兵無多實不能分撥已准令畱防本處矣福濟等連克各城士氣倍奮今欲添調客兵亦恐緩不濟急鄰境省分又實無兵可調福濟等卽當就此見有兵勇激勵圖功由桐城而至安慶迅掃鯨鯢然後協同和春等規復江南同膺懋賞是所望也將此由六百里加緊各諭令知之○福濟奏派兵進擣和州本城難民協助殺賊立將州城克復得旨被陷難民尙知齊心殺賊足徵人心向順大有轉機亟宜乘勢激勵俾人自爲戰迅期蕩平○

命福建提督秦定三馳往安徽蒙亳一帶會同河南巡撫英桂督剿捻匪○以克復和州加總兵官音德布提督銜○以團勇助剿克復城池免安徽無爲和舒城廬江四州縣新舊額賦並永廣無爲廬江學額各三名○調杜翻爲戶部右侍郎以車克慎爲禮部右侍郎前任侍郎○己亥諭內閣本年六月大學士賈楨丁母憂朕以賈楨在上書房宣力有年簡任綸扉辦公勤慎是以援照雍正年間大學士朱軾尙書蔣廷錫之例降旨賞假六箇月令其扶柩回籍假滿後來京當差庶教孝勸忠情禮兼盡茲賈楨於百日後具摺謝恩並以伊母本有五子今存者惟伊一人籲請終制情詞懇切自應俯如所請以遂孝思賈楨著准其開缺回籍終制前據御史鄒煥杰奏賈楨停柩在京並無回籍之意自係傳聞之誤惟所稱君有優旨原恩厚而情深臣必固辭乃心安而理得等語持論

甚正見在賈楨卽日扶柩回籍並懇恩終制業已降旨允准適與該御史所見相符所請照從前大學士張玉書大祥後宣召來京之處著毋庸議○胡林翼奏九江安慶賊船陸續護糧上竄九月初五日總兵楊載福由河口往剿追至蘄州開礮轟擊焚毀賊船七十餘隻蘄州城賊率眾出救楊載福令陳金鰲王明山二營登岸誘敵令周清元丁泗濱二營從下游乘虛入城前後夾攻城外之賊大亂殲斃五六百名踏平賊壘三座直抵田鎮焚奪賊船八十三隻奪獲礮船四隻大小礮位二十尊其咸甯之賊竄馬橋柏墩等處經署知縣黃鐘鳴督勇擊退八月二十五日偽尙書魯逆領眾三千餘人併力來犯至通山交界之小嶺黃鐘鳴督勇集團迎剿斃賊二百餘名生擒八十五名九月十五日賊繞道崇陽返竄丁泗橋黃鐘鳴率領把總唐明周德麟等星夜往剿斃賊二百

餘名賊眾敗退黃鐘鳴收隊亟歸籌備守具賊偵知兵少卽日直薄城下賊眾二千餘人分踞城外山巔輪流撲城圍攻三晝夜城上槍礮齊發擊斃馬賊數十人賊於十八日宵遁城圍立解黃鐘鳴率勇尾追各團聞信四面兜截於黃石洞望谷坳蘇家嶺馬橋等處又擒斬數百名事獲旗幟刀矛多件逃去賊匪僅三四百人均往興國竄逸此次事轉戰無前黃鐘鳴出奇制勝所有最爲出力暨陣亡員弁可否仰懇 天恩給予獎卹 上諭九江安慶賊船上竄蘄州經楊載福等追剿焚毀賊船蘄州城賊出救我兵乘虛入城踏平賊壘直抵田鎮焚奪賊船八十餘隻咸甯之賊竄馬橋柏墩撲犯通山交界之小嶺黃鐘鳴等督勇迎剿賊敗後偵知城內兵少復薄城下圍攻三晝夜賊始宵遁城圍立解雲夢縣典史代辦咸甯縣知縣黃鐘鳴殺賊守城諸勇出力著開缺以知

縣畱於湖北儘先補用○諭軍機大臣等胡林翼奏軍餉日絀請飭撥解等語據稱楚省南北兩營每月水陸兵勇口糧及製造軍火約需銀二十餘萬兩該省鹽課釐金等款僅敷十分之二又因夏秋亢旱荒象已成額賦錢漕均少起色以致兵勇餉銀積欠日久爲數愈多所奏自係實情此時楚省官軍攻城築圍斷賊接濟將士極爲用命正當乘此銳氣力圖克復若因餉絀短絀致勁旅精兵漸生懈志於大局實有關繫四川距楚較近餉道亦一水可通著樂斌卽行籌畫銀十數萬兩陸續分起解往湖北胡林翼軍營以濟急需將此由五百里諭令知之○大學士兩廣總督葉名琛奏奉到 硃諭恭賀 天喜得旨覽卿所奏期朕衍五代一堂之慶朕雖德薄才疏敢不勉效 純皇之敬勤惟知夕惕朝乾盡君職以答鴻貺若云初願之能符與否敬俟 天命已也○子湖

北陣亡知州楊嘉運等祭葬世職○命陝西巡撫吳振械山西巡

撫王慶雲各撥銀七萬兩濟伊犁軍需○庚子以聯奎爲盛京兵

部侍郎

由左副都御史遷

○壬寅諭軍機大臣等英桂奏襄樊匪徒竄入

南陽府屬之鄧州見已失守逼近郡城復據史榮椿奏皖省捻匪蔓延已近徐州情形緊急均請撥兵援剿各一摺捻首張落刑等糾眾數萬謀竄徐州旁竄豐碭蕭各縣史榮椿等所帶兵勇止能專顧郡城無可分撥見在捻匪誘脅甚多深恐蔓延徐州爲北路門戶自應迅籌堵扼而山東一省已無兵可調惟揚州大營距徐不遠著德興阿等速派兵勇一千名並揀得力大員統帶馳赴徐州會同史榮椿剿辦毋稍延緩至河南捻匪勢尙披猖而襄樊匪徒又復四出竄擾陝西境地毗連調兵助剿尙屬切近著譚廷襄於該省各營內調兵二千名派委得力鎮將迅速帶往南陽一帶

與邱聯恩會合攻勦至陝省地面防堵需兵即可酌調甘肅各營兵丁到陝分撥防守將此由六百里加緊各諭令知之○諭前因戴增等奏襄陽逆匪回撲樊城當諭官文飭令常恩會同馬秀儒等攻勦且恐兵力尙單常恩不能得力並諭官文添調兵勇另派大員統帶本日據英桂奏該匪竄至鄧州襄陽焚掠兵勇退守州城卽於初九日失陷此股匪徒既竄新野復陷鄧州勢甚猖獗該處偏近南陽僅止六十餘里而襄陽被圍樊城尙爲所踞楚豫兩軍不能合力夾擊常恩如果得力何至郡城日久尙未解圍且致蔓延鄰境著官文等察看營中大員如都興阿等實能帶兵督勦者酌派一員迅速前往統帶馬步各隊相機攻擊以期得力襄樊得手之後亟應進勦新鄧與豫軍會合但不可跟蹤尾追驅之北嚮總宜設法繞出賊前迎頭截擊是爲至要將此由六百里加緊

諭令知之○諭英桂奏馳抵鹿邑分路進剿並鄧州失陷派兵赴
援一摺捻匪大股既踞渦河南岸該撫自應會同袁甲三迅督兵
勇渡河南擊方能與郝光甲等諸軍聯爲一氣據奏調派穆騰阿
等管帶馬隊崇安等管帶步隊各事宜已有直搗賊巢之勢而摺
內又稱東南處處匪巢恐輕進失利等語是尙以相持爲長策何
時方能會合皖軍該撫既抵鹿邑距亳州不過數十里卽著與袁
甲三合兵前進迅將渦河南岸匪巢盡力勦洗再圖分兵四出不
准隨處駐紮以布置爲詞致各路不能兼顧至永夏虞城一帶據
奏止稱探有匪蹤是尙未知徐州危急本日據史榮椿奏永夏捻
匪已擾及碭山並分擾豐縣之許家口蕭縣之黃家口三股會合
直撲府城該署總兵兵勇僅止六千止能專顧郡城不能兼顧各
處其緊急情形實爲可慮該撫見派莫爾賡額先帶馬隊五百名

馳往永夏一帶卽著飭令迅赴徐州助解城圍宿州兵尙復不少
見在匪黨全趨東北該州警信稍鬆著英桂卽傳知宿城帶兵各
官分兵馳往徐州統交史榮椿調遣本日復諭知德興阿等撥兵
一千名赴徐應援並著傳知史榮椿沿途迎提以資會剿至鄧州
失陷南陽萬分喫緊邱聯恩業經帶兵馳往卽著飭知該總兵迅
圖撲滅毋使再有蔓延所請飭調陝西官兵已諭知譚廷襄抽撥
精銳二千名派得力大員帶往會剿並諭官文等另派大員速解
襄陽之圍以便與陝豫官兵夾擊然過其北竄之路尤以豫境爲
喫重該撫仍宜速籌布置不得專待陝省之兵始行進剿另片所
陳請暫畱察哈爾馬隊等語著准其暫緩分撥伊興額見在徐州
其原帶馬隊派赴懷遠是否卽係關係管帶鄧州文武下落並著
查明具奏將此由六百里加緊諭知英桂並傳諭史榮椿知之○

癸卯諭軍機大臣等前據崇恩奏存兵不敷請畱防本省一摺業經允其所請惟昨據英桂奏永夏交界會亭集及虞城連界地方均有匪蹤並據史榮椿奏捻匪竄擾碭山豐蕭各縣大股數萬直逼徐州府城虞城近接山東曹單徐州與蘭山郟城等處亦爲切近恐該匪乘虛北竄則東省之劉家口及省南山路之紅花埠湖路之滕嶧等縣皆與江蘇毗連處處可以闖入崇恩旣稱兵力不能協濟鄰省則本省布置亟應豫爲籌辦著卽酌撥兵勇嚴扼各要隘以期周密其應如何分撥防守之處並著先行具奏劉口河岸見在尙存防兵若干是否足資控扼著王履謙李鈞會同崇恩體察情形嚴飭地方員弁實力稽查以杜匪蹤闖入曹單本多捻匪紅花埠一帶近聞亦多搶劫行旅之案此時添兵彈壓不但可防外來之匪並可接捕本處匪徒以靖地方王履謙等務當隨時

偵探徐州虞城等處捻匪情形妥爲布置毋致臨事周章將此由
六百里各諭令知之○甲辰諭內閣何桂清奏徽郡官軍克復休
甯縣城一摺江西德興賊匪經官軍勦敗後竄至徽州婺源攻陷
縣城結連各路匪徒分股竄踞休甯縣城張芾派撥兵勇親自督
陣斃賊千餘賊仍四出焚掠休歙兩縣鄉團羣起殺賊擒斬百數
十人張芾聞丁母憂仍出示曉諭軍民兵勇墨經從戎誓滅此賊
賊以大股分撲各營江長貴等奮力夾擊守備羅承勳手然大礮
立將兇悍賊首楊國宗轟斃賊眾大潰我軍追殺數里該匪盡焚
其巢併踞城中張芾親赴督戰兵勇踊躍登城遂於十月初四日
將休甯縣城克復派員安撫居民仍飭江長貴等分路進勦竄匪
此次張芾督飭江長貴等勦辦竄擾徽郡股匪將士用命各路民
團齊心殺賊辦理頗屬認真著何桂清仍飭在事文武迅速勦捕

肅清徽境再將出力人員彙案保奏○諭軍機大臣等何桂清奏張芾見在徽郡軍營聞訃丁本生母憂可否賞假六箇月回籍營葬假滿再赴徽州辦理防剿等語徽郡毗連甯國池州廣饒等處軍情正當喫緊該處防務如有可以接替張芾者卽著何桂清一面奏明派往一面傳旨賞給張芾六箇月假期令其回籍營葬如一時無人可以接替卽傳諭張芾暫畱徽郡督辦防剿俟接手有人再行回籍將此由五百里諭令知之○諭曾國藩文俊自八月三十日奏報瑞州建昌勝仗之後迄今已及月餘未見續報昨據廉兆綸奏有探聞撫州官軍失利之語與本日何桂清奏報相同亦未見曾國藩等入奏前聞賊匪多回至金陵而江西失陷各郡尙無一處克復所有占踞城池之賊聞皆石逆黨與誘脅土匪爲之拒守卽廣東新附匪徒亦皆係石逆所糾集與金陵逆黨尙未

歸併見據江浙各省奏報皆言金陵內亂楊逆已爲韋逆所殺又聞楊逆被殺後石逆不服逃出金陵洪逆見懸重賞購其首級可見石逆斷不再返金陵金陵亦不肯更助石逆昨又據福濟等奏石逆見在安慶桐城一帶其爲糾合黨與自圖占踞已可概見見在福濟等已攻克巢縣和州不日即可進擣安桐而湖北沙口田鎮水陸兵勇屢絕賊援恐石逆不得逞志於皖楚勢必竄入江西該逆於諸賊之中最爲兇悍若令回竄江西占踞數郡煽惑羣民其勢愈難收拾著曾國藩等乘此賊心渙散之時趕緊克復數城使該逆退無所歸自不難窮蹙就擒若徒事遷延勞師糜餉日久無功朕卽不遑加該侍郎等以貽誤之罪該侍郎等何顏對江西士民耶又聞石達開見因與韋逆不睦頗有投誠之意雖未必卽係確信而窮蹙思降亦或事之所有此輩狼子野心原難輕議招

撫僦向曾國藩處乞降應如何處置之法或使先自立功贖罪再邀重賞亦當豫爲籌畫經權互用以收實效見在仍將失陷各城先圖攻克使該逆無所憑藉不敢退至江西是爲至要本日據何桂清奏請飭催候補同知吳坤修將所帶彪勇二千五百名速赴廣信等語此項壯勇何以日久未到著曾國藩等查明飭令該勇迅速馳往以便饒廷選回駐玉山毋稍延緩將此由六百里諭令知之○以克復休甯五品頂帶前任江西巡撫張芾得旨嘉獎命俟服闋後以三品京堂補用○展緩八旗兵丁應扣借支庫銀○乙巳諭軍機大臣等昨據英桂奏永夏交界會亭集及虞城連界地方均有匪蹤並據史榮椿奏捻匪竄擾碭山豐蕭各縣大股數萬直逼徐州府城匪勢鴟張深恐竄至東境已令崇恩於毗連徐州之郟城等處設防其虞城等處毗連曹單並諭該撫會同王履

謙李鈞嚴防河岸以杜竄越矣因思本年直隸山東所屬地方多被旱蝗無業游民最易流而爲匪畿輔重地與山東接壤必有重兵彈壓方足以鎮定民心本日已諭令慶祺調盛京官兵一千名穆隆阿調察哈爾官兵一千名馳赴直隸聽候桂良調遣著桂良會同雙銳先於直隸各營內抽撥精銳官兵一千名由雙銳統帶馳赴直東交界地方擇要駐紮以資彈壓所有盛京察哈爾官兵到省均歸雙銳管帶桂良接奉諭旨後著與雙銳商定駐紮處所雙銳抵省後酌帶官兵前往直隸提督著桂良派委妥員署理將此諭知桂良並諭雙銳知之○調盛京官兵一千名察哈爾官兵一千名赴直隸聽候調遣○丁未諭內閣勞崇光奏勦辦右江滋事逃兵及句結土匪攻破賊巢殲擒殆盡一摺上年五月右江鎮標兵丁滋事革弁李現光糾約不法兵丁竄踞法村地方句結土

匪戕官撲城復由土田州一帶添糾土匪疊次攻撲廳城均經隨時擊退復分夥屯踞陽萬土州之那畢大灣等處竄擾土上林縣境各文武督飭各土官隨時進剿將首匪夏振大殲斃隆安縣知縣陶兆恩與總兵奚應龍節次進剿斃匪多名忽有另股匪徒由西林竄至凌雲縣之雪平墟將與法村匪徒合夥陶兆恩會同署遊擊馬東旭等馳往截擊當將首逆覃四殲斃馬東旭等率同團練環攻法村我兵潛入賊巢舉火內外夾攻殲斃焚斃匪黨無數生擒首匪黃色讓等四十六名當將賊巢平毀地方一律肅清辦理尙屬認真所有出力官紳著勞崇光確切查明擇尤保奏署右江鎮總兵奚應龍署右江鎮遊擊馬東旭於兵丁滋事未能約束咎有應得惟籌防堵剿見已竣事功過尙足相抵均著免其察議

○諭勞崇光奏柳州水陸匪徒被擊敗竄郡城解嚴一摺廣西潯

州匪由武宣象州竄至柳州府城撲擾經該撫飭令署右江道
孫蒙署提標參將湯遇珍等籌辦並委署遊擊郭承修千總韓壽
由省城帶勇馳剿水陸各股匪竄至大橋及都樂羊欄等村銅鼓
嶺白沙黃村等處地方並逼近府城攻撲均經委員徐引團總區
振綱及韓鳳等各督兵勇圍練擊剿疊次斃賊千餘名及數百名
不等該匪等分股敗竄又經韓鳳設法解散陸匪其首匪張高友
率其餘黨千餘竄至雒容縣之洛垢一帶欲撲縣城適郭承修等
帶勇抵縣迎擊敗走代理知縣李聲佩及韓鳳帶勇均先後趕到
前後夾攻乘勝跟追斃匪甚多餘匪向大葉龍嶺一帶分竄其停
泊冷泛灘艇匪因上游匪船逃散退泊下游復經兵勇圍練沿河
追擊連日均有斬獲已由運江逃往象州一帶紛竄所辦尙妥所
有在事出力員弁兵勇著該撫查明擇尤保奏候朕施恩其前經

摘去頂帶之署右江道事太平府知府孫蒙署提標中軍參將事
思恩營遊擊湯遇珍於被參後卽將該匪剿散尙知愧奮均著給
還頂帶以觀後效仍著該撫督飭該文武員弁會集團練將逃竄
餘匪跟蹤剿捕務期淨盡以靖地方○諭蔣蔚遠奏克復三腳塋
一摺貴州苗匪屯踞獨山州之三腳塋分竄肆擾經該撫派令把
總王啟菰已革州同陽明分帶兵勇及各處團練堵剿斃賊二千
餘名擊殺賊目多名連破賊卡四座生擒僞千總鄒世明等三十
一名直抵三腳塋餘匪逃潰遂將賊棚燒燬著卽嚴飭帶兵將弁
將入寨都江等處迅圖克復毋再遲延已革三腳塋州同陽明於
參革後屢立戰功復帶練收復汎城著開復州同原官並免捐復
原資畱於貴州補用○諭軍機大臣等御史張雲望奏請免抽江
浙米石釐捐一摺江浙兩省見被旱災自應廣招米販以裕民食

若令因於抽捐恐商販因之裹足向來災歉地方多有免徵米船
關稅之舉況抽釐本屬權宜原非定制著怡良趙德轍何桂清各
於該省地方體察情形應行免抽者卽著寬免以示體恤其或該
地方並未成災而捐釐爲數細微無妨民食者亦毋庸概行停止
總期於民食餉需兩無窒礙方爲妥善將此由五百里各諭令知
之○諭秦定三奏連日打仗獲勝奪毀賊營十座斃賊千餘名勦
辦尙爲得手惟我軍米糧子藥用盡急須接濟前據福濟奏稱桐
城待援已派吉林熱河馬步隊二千餘名星夜赴桐並飭滕仲武
帶陝甘兵五百名由廬江就近馳往此次該提督奏報亦稱援兵
已到未知鄭魁士何日拔營前進所需米糧子藥自必寬爲籌備
一俟各兵到齊卽可乘勝進擣賊巢盡殲羣醜福濟前奏探知石
逆見竄安桐一帶秦定三復稱賊黨內有李兆受等夥匪意圖勾

結張落刑以死守桐城爲保護安慶之計等語石逆素稱兇悍今復加以擒匪李兆受夥黨勢更猖獗必須先克桐城方能進圖安慶著福濟鄭魁士迅籌米糧火藥以資接濟至見在擒匪已擾及徐州情形緊急鄭魁士一到桐城卽著秦定三迅往會同英桂調度各軍分路兜剿以靖地方將此由六百里諭知福濟鄭魁士並諭秦定三知之○諭邵燦庚長奏擒匪回竄攻撲徐州請兵救援一摺擒首張落刑等糾眾數萬竄徧徐州旁竄豐碭蕭各縣已據史榮椿奏請撥兵援剿當降旨令德興阿等速派兵勇一千名派員帶赴徐州著邵燦等星速迎提催赴徐州雖河漕兩標存兵無多仍著邵燦庚長酌撥兵勇數百名馳往徐州以助聲勢一面飛飭蔡冠倫帶兵迅速趨行毋稍延誤將此由六百里諭令知之○陝西巡撫譚廷襄奏湖北襄樊土匪滋事陝省商南一帶防務緊

要見飭派兵擇要設防以重邊境得旨已有旨令汝撥兵助剿今覽奏商南既近南陽卽可由此出境迎剿以期迅速○實授李孟羣湖北按察使○派御前侍衛副都統德勒格爾乾清門侍衛舒明阿管帶察哈爾馬隊官兵赴直隸備調○撥山東司庫銀五萬兩濟江南軍需○戊申諭軍機大臣等本日據崇恩奏難民渡河北上請飭直隸總督飭屬查察等語江蘇河南兩省因捻匪竄擾難民紛紛北渡直隸與山東接壤大名一帶復毗連豫省本年災區較廣河南捻匪尙未肅清設有匪徒乘間闖入直境關繫匪輕著桂良嚴飭各屬設法截留安撫或資送回籍並嚴密稽查毋任匪徒溷迹致滋事端江豫難民旣由東入直崇恩卽應力籌安插之法毋令紛紛北竄豈得藉口災歉頻仍畏難自阻該撫見已咨令河南江蘇飭屬截留卽著邵燦庚長將該處被難災民妥爲安

插並傳諭文煜一體截畱設法安集毋任轉徙流離致滋他患英桂兒在勦辦擒匪於該省難民亦應隨時撫恤俾無業窮民各安鄉里不得任其續入直隸山東境內是爲至要將此由四百里諭知桂良邵燦庚長英桂崇恩並傳諭江甯布政使文煜知之○予江南陣亡參將李鴻勳河南殉難知縣徐本立祭葬世職建祠訓導趙寅等祭葬世職○己酉諭內閣步軍統領衙門奏稽查無業游民請申明舊例一摺所有嘉慶十八年奏定編查保甲及道光九年奏定整頓什家戶各章程著該衙門循照舊例實力奉行其城外五城地面向例未曾議及並著移咨都察院轉飭五城御史督飭司坊官一體遵照認真辦理毋任稍有疏懈以肅地方○諭福濟奏糧臺支放款目未能依限造報一摺各路糧臺支發各款自應遵照部議奏定章程按期覈報茲據該撫奏稱廬州糧臺自

咸豐四年至五年七月實收銀數業已造冊送部惟因舒城等處分設糧臺共十餘處頭緒紛繁未能分晰依限造報自係實在情形所有安徽軍營糧臺支發各款著准其展緩報銷俟設局專辦另立限期以後仍著按期清理不得藉詞懸宕致日久愈滋軫輶○諭軍機大臣等福濟奏請暫畱秦定三會攻南路並請派勝保赴蒙城督剿捻匪等語見在鄭魁士業已馳抵桐城福濟不日亦卽前往會剿是皖省南路軍務已接辦有人而蒙城等處帶兵各員甚不得力非秦定三親往督率不能望其振作自應迅速移營北向以資攻剿秦定三著仍遵前旨馳赴蒙城督率皖北各軍會同英桂剿辦捻匪毋庸再畱桐城致北路轉有貽誤至勝保奉旨來京是否派往軍營朕心自有斟酌見在該員尙未到京豈能以刻不容緩之軍情久懸以待勝保之至耶將此由六百里各諭令

知之○諭福濟奏豫省協濟米麥請折價解往等語據稱周家口以至臨淮時有匪蹤出沒道路難行抽兵運米爲費不貲且自八月以後沿江圩田稍有收成非如六七月間之缺米請飭豫省照山東折價章程撥解銀兩就近採買所有原備米麥卽留爲河南賑恤之用等語安徽餉精緊要見在既可自行購買卽毋庸撥解米麥著英桂卽將折價銀二萬八千兩剋日解赴廬州以歸簡易將此由四百里諭令知之○庚戌撥廣東司庫銀十萬兩濟湖南軍需○辛亥諭軍機大臣等官文等奏襄陽樊城賊匪被剿敗退一摺前因襄樊匪徒竄擾新野復陷鄧州諭令官文於都興阿等大員內酌派一員統帶官軍進剿一俟襄樊得手卽與豫軍會剿新鄧本日據官文等奏襄陽解圍樊城賊亦敗去是賊勢全注新鄧勢將北竄雖經諭令譚廷襄於陝西撥兵會剿並據英桂奏稱

已派總兵邱聯恩帶兵前赴南陽惟該二省兵力尙單見在襄樊兵勇爲數不少自應無分畛域迅速進擊所有統兵大員官文當已遵旨酌派儘都興阿一時未能前往亦著揀派得力大員先行帶兵赴鄧州等處會勦務將賊蹤迅速掃除毋以驅賊出境遂爲了事致令蔓延鄰省也將此由六百里諭令知之○壬子諭內閣何桂清奏徽境肅清並甯國疊勝情形一摺徽州府官軍自克復休甯後餘匪分股竄踞黟縣及漁亭等處官軍進攻漁亭賊匪敗遁遂勦黟縣直逼東門逆匪紛向北門竄逸官軍於收復縣城後將分竄祁門之賊追擊至太平縣境沿途擒斬多名徽郡全境業已肅清其甯國賊匪經提督鄧紹夏督兵分路迎勦其計殲斃數百名連次進攻將出城抗拒之賊殲斃數百名著該提督迅速克復城池毋令蔓延在事出力人員著何桂清與前次克復太平祁

門案內各員著俟甯國軍務完竣後覈實查辦○諭邵燦庚長奏
官軍擊退徐州捻匪城圍已解一摺捻匪攻撲徐州勢甚猖獗總
兵史榮椿欽兵入城登陴固守經邵燦等派撥兵勇前往援應史
榮椿派令千總張振西把總滕加勝分帶兵勇由南北兩門出擊
適有賊騎至西關放火被張振西等殲斬殆盡遂合隊直入賊中
施放火箭然燒賊營東南二門亦開放大礮接應兵勇乘勢奮擊
賊眾慌亂遁逃城圍立解其攻圍蕭縣之匪亦經侍衛伊興額等
擊退餘匪悉向西南遁去此股捻匪窺伺徐州既經擊退尤應速
行掃蕩著邵燦庚長嚴飭史榮椿會同揚州大營所派帶兵各員
並該漕督等所派帶勇員弁探明匪蹤迅速剿捕毋任蔓延此次
出力人員並著邵燦等擇尤保奏○諭軍機大臣等前因捻匪竄
撲徐州諭令德興阿等撥兵赴援並諭邵燦庚長派兵馳往以助

聲勢旋據德興阿等奏已派兵勇一千七百名交蘊秀統帶前往
本日復據邵燦等奏派勇一千二百名分起赴援已於十六日將
擒匪擊退府城解圍此次竄圍徐州及蕭縣各匪雖經兵勇擊退
而虞城夏邑匪勢尙熾豐縣碭山亦未肅清另股捻首張逢科復
近在蕭宿接壤之東山套一帶嘯聚其窺伺徐城之意尙未盡絕
邵燦等既飭派出各員探明進剿卽著傳知史榮椿探明匪蹤迅
速迎擊並飭知在城文武妥爲布置毋稍疏懈德興阿等派出兵
勇前據奏稱一俟徐城圍解卽令折回揚營此時徐州兵力甚單
邵燦等所派有勇無兵馬隊一項萬不可少著德興阿等將派出
兵勇暫緩撤回卽飭隨同史榮椿分路進剿以厚兵力伊興額原
帶馬隊業已派赴懷遠未便折回該處既有揚營派來馬隊足資
剿辦著卽撥歸伊興額統帶虞城夏邑等處匪蹤已諭知英桂迅

速派兵會剿矣將此由六百里各諭令知之○諭邵燦庚長奏徐州解圍夏邑虞城等處匪勢猖獗一摺前據英桂奏馳抵鹿邑派兵分路進剿旬日以來未據將進剿情形續報見在徐州之匪雖經邵燦等派撥兵勇會同史榮椿擊退而豐縣碭山均各告警至夏邑虞城等處匪勢尤屬縱橫該處爲北竄要路豈容任其蔓延爲患此時秦定三進攻桐城正在喫緊恐未能卽赴蒙亳英桂自應迅速進兵未可因待秦定三合兵轉致遲誤著該撫遵照前旨速由鹿邑統兵前進將渦河南岸匪巢剋期掃蕩以便節節進攻其夏邑虞城一帶前據奏稱派莫爾廣阿帶馬隊五百名前往深恐兵力尙單並著英桂悉心斟酌或令袁甲三帶兵前赴該處或另派得力大員管帶重兵前往奮力剿擊儻不能嚴密堵剿致令北竄朕惟英桂是問將此由六百里諭令知之○予安徽陣亡遊

擊江忠信等河南陣亡遊擊馬從龍等祭葬世職○癸丑諭內閣
各省府州縣官均有守土之責遇有賊匪竄擾嬰城固守克保城
池朕不惜破格施恩以昭激勸其失守各員有能於事後奮勇殺
賊力贖前愆者或准其免罪畱營效力原屬法外之仁豈容視爲
常例近來各路統兵大臣及各省督撫往往於失守員弁動以功
過相抵爲詞不但寬其罪名甚至仍畱原任且有失守之時並不
奏參直至克復後徑請免議者似此曲爲開脫何以持刑法之平
著通諭各路統兵大臣督撫所有失守後隨同克復各員止准酌
減罪名或從寬免罪仍帶降革處分不准遽請開復俟續有勞績
方准酌量保奏以杜冒濫而示勸懲將此通諭知之○是月給福
建龍溪等三縣被水災民一月口糧蠲免直隸開州等八州縣被
水村莊本年額賦並蠲貧民口糧暨衝塌房屋修費蠲緩直隸通

州等五十七州縣被災額賦暨河淤海防經費攤徵並減免差徭
緩徵湖南乾州等四廳縣佃欠屯租並免鳳凰等三廳縣節年未
完穀石